

Mỳjja apôx kêtri kukãm 'ã ujarênh ne ja.

Běnjadjwỳr Jeju Kritu ne Djuãomã, ò àpênhbê Djuãomã mỳjjao amirît. Me kute Jeju mar kêtja ne me me kute amim Jeju marjao bikênh ar o ba. Nhym kam Jeju kute ò me jao tỳx nhym me akubyn tỳx ne kute kanga kêt kadjy Djuãomã mỳjjao amirît. Te me kute meo bikênhkam mã Jeju'ã ngràn kute kanga kêtmã kum o amirît. Anhỳr djwỳnhrà m kum o amirît, abentã kum o amirîto tẽ, mỳjja'ã akreo tẽ. Ò me jabit kute mỳjja mar nhym me kâtambê bipdjurmã ne apỳnh mỳjja djàri'ã mỳjja jakre. Bir, nhym mỳj ne Djuãomã?

Metĩndjwỳnh kute me axwemã o pãnh ne tu kute mỳjja jaxwe kunĩ kuwyo imôkam rênh nhym apêxmã. Nhym kute Xatanajdjwỳ bĩn nhym kêt nhym kam pyka ajte nyn tu mexkumrêxmã ne kum o amirît. Ne kum kàjkwadjwỳ jakre. Metĩndjwỳnh kute ò me jao kĩnhmã, me 'ã ngrã tỳx ne kute kanga kêtja, me tãm ne kute meo kĩnh nhym me kàjkwakam ò pykakam kĩnhkumrêx ne ar ba rã'ã rã'ãmã. Kam ne me mexbit ar ban kam kanê kêt ne tyk kêt ne mỳr kêt. Mỳjja punu 'ỳr àr kêtkam. Ja kunĩ ne kum o amirît, apôx djwỳnhrà m kum o amirît. Nhym Djuãomã kadjy omũ. Mỳjja apôx kêtri ne anhỳr djwỳnhrà m omũn memã arẽ. Tãm ne ja.

Me kute pi'ôkjakôt amijo baja dja me kĩnh.

1 ¹ Jeju Kritu kute mỳjjao amirît ne ja. Metĩndjwỳnh ta ne Jejumã arẽ nhym kam amidjô'ã ajte kute ò àpênhjamã o amirĩtmã, nhym kam me kute marmã. Apỳnh mỳjja djàri dja ì apôx, amikrà kêt ne apôx nhym anhỳr djwỳnhrà m arỳm kute memã o amirĩtmã. Imã ne arỳm o amirît ba kam ije me amã arênhmã. Ba ibê Djuãomã ne ba Metĩndjwỳnhmã idjapênh, imã ne o amirît ba ije me amã arênhmã. Nãm iwỳr kadjy mrãnh djwỳnh jano nhym kam imã mỳjja kunĩ jakre ba kam kôt omũ. ² Ije arỳm kunĩ pumũnhkam dja ba prĩne me amã kunĩ jarẽ. Metĩndjwỳnh kabên ne ba arỳm ije me amã arênhmã. Jeju Kritu kute katat kabên jarênh tãm dja ba me amã arẽ.

³ Metĩndjwỳnh kute anhỳr djwỳnhrà m mỳjja'ã memã ujarênh ja gêdja me'õ memã arẽ nhym kute arênh djwỳnh tãm gêdja arỳm Metĩndjwỳnh kum kĩnh jadjà. Nhym me kute mar ne kôt amijo bajadjwỳ gêdja Metĩndjwỳnh memã kĩnh jadjà. Dja amẽ aro kĩnh, me kute 'ã ujarênh djwỳnhho kĩnh ne kam ajte

me kute maro ÿr jadjwỳo kĩnh. Bir, arỳm 'ỳr. Arỳm Metĩndjwỳnh kute memã mỳjja anhỳr djwỳnhrãm arẽnh ja arỳm apôx 'ỳr.

Djuão apỳnh me kute Jeju'a abeno bikprõnh djàri kubê 7mã kabẽn.

⁴Ba ibê Djuão ne ba ar amã pi'òk no'òk ne. Ar aje amim Jeju mar ne apỳnh aje kòt aben pydjija, ar amã ne ba pi'òk no'òk ne. Pykabê Adjikkam apỳnh krĩ rũnhkòt ar aje 'a abeno abikprõnh 7ja me amã ne ba pi'òk no'òk ne.

Gê Metĩndjwỳnh ukaprĩkòt me ajo djuw mex ne ar me ajo ba ne me amã umar mex jarẽ ga me adjumar mex ne ar aba. Metĩndjwỳnh ta ne tĩn ne ar ba, amrêbê adjàkamã tĩn ne ar ba. Dja mrãmri tĩn rã'ã rã'ã. Tãm dja ukaprĩkòt me ajo djuw mex ne me amã umar mex jarẽ.

Nhym Metĩndjwỳnh Karô kute amijo 7 ne Metĩndjwỳnh krĩ djà kòngh ku'ê tãm gêdja adjwỳnhdjwỳ me ajo djuw mex ne me amã umar mex jarẽn ar me ajo ba.

⁵Nhym Jeju Kritudjwỳ dja me ajo djuw mex ne me amã umar mex jarẽ. Jeju Kritu ta kute mrãmri katàt memã Metĩndjwỳnh kabẽn amirĩt djwỳnh ne kumrẽx tyk ne akubyn tĩn ne kator gêdja Metĩndjwỳnhmẽ Metĩndjwỳnh Karômẽ kudjwa me ajo djuw mex. Jeju ne bẽnjadjwỳro kute me bẽnjadjwỳr kuni jakrenh ne pyka kunĩkòt me ô bẽnjadjwỳro ba. Tãm dja Metĩndjwỳnhmẽ Metĩndjwỳnh Karômẽ kudjwa me ajo djuw mex ne me amã umar mex jarẽ.

Jeju Kritu ta ne kum me bajabêkumrẽx ne amikamrôo me bajaxweo ajngrã. ⁶Ne kam ajte ta ar me bajo ban kam Bãmmã me bapumjuw gu me kam babê me kadjy Metĩndjwỳnh mar djwỳnh ne Bãmmã badjapẽn ar baba. Kumã, Jeju Kritu tãmmã gora gê me kàjmã kum rax jarẽn rã'ã rã'ã. Gêdja umao ar me bajo ba rã'ã rã'ã. Mrãmri. Tãm ne ja.

⁷Ori, amrê tẽ. Kakrãkòt ne amrê tẽ. Me kunĩ dja me omũ. Me kute Jeju kanhwỳr djwỳnhjadjwỳ dja me omũ, prĩne Jeju pumũ.

Nhym apỳnh pyka djàri dja me kunĩ omũn amra, Jeju pymaje àmrão kumex.

Mrãmri dja me kunĩ omũn amim ngryk ne àmrão kumex. Be, tãm ne ja.

⁸Bẽnjadjwỳrbê Metĩndjwỳnh ne memã kum,

—Ba ibê mỳjja kunĩ krax ne ajte ibê mỳjja kunĩ 'ênhòt, ane.

Nãm ã Metĩndjwỳnh tỳxo kubê kumkati ane. Metĩndjwỳnh, ta ne tĩn ne ar ba, amrêbê adjàkamã tĩn ne ar ba. Dja mrãmri tĩn rã'ã rã'ã. Ajbit ne umao mỳjja kunĩ pytã.

Jeju Djuãomã amijo amirĩt.

⁹Nà, ba ibê me akamy Djuão. Nãm me Jejukòt me akudjwa ijo ajkê ba itokry. Mrãmri ne Jeju me baro'ã me bapytàn ar me bajo ba. Ba kam me akudjwa mã Jeju'a ingrã tỳx ne 'ãno djan ije kanga kêt. Ba ne ba apêxtibê Paximukam ar ba. Na bãm memã Metĩndjwỳnh Kabẽn jarẽn memã Jeju'a idjujarẽn iba. Nhym kam me ja ngryk ne kam imã,

—Kwãrĩk wãnh mỳjja wã jarẽn kêt, ane. Ne kam ipa 'amỳn kam ijo tẽn apêxti jakam imẽ ba kam kam ar iba.

¹⁰Be, pi'ôk kamrêkkam, Běnjadjwỳr nhô akatijakam ne ba arek maro nhỹ nhyim Metĩndjwỳnh Karô ar ijo ba. Ba kam me'ô kaběn ma. Me'ô kaběn tỳx kute poti kakôr tỳx pyrâk. Ikôt ne imã kaběn ne. Ne imã,

¹¹—Ba ibê mỳjja kunĩ krax ne ajte ibê mỳjja kunĩ 'ênhôt. Ba ren ije kâjkwamê pykamê omũnh 'âno idjãm kêt nhyim ren amrêbê amijo ajkê nhyim ren mỳjja kunĩ kêt ne. Ê, amrê tẽn mỳjja pumũn 'ã pi'ôk no'ôk, ane. 'Ã pi'ôk no'ôk ne kam memã ano. Me kute amim Jeju mar ne apỹnh kute kôt aben pydji, me jamã dja ga ano. Me kute apỹnh krĩ rũnhkôt 'ã aben pydjibê 7, ar kute Epexukam 'ã aben pydjijamê, ar kute Emĩnakam 'ã aben pydjijamê, ar kute Pegamukam 'ã aben pydjijamê, ar kute Xijxirakam 'ã aben pydjijamê, ar kute Xadjikam 'ã aben pydjijamê, ar kute Pirapijka 'ã aben pydjijamê, ar kute Raodjikam 'ã aben pydjijamê, mekmã dja ga aje mỳjja pumũnhja'ã pi'ôk no'ôk ne ano, ane. Nãm ã imã kaběn ane.

¹²Ba kam 'ỳr akêx. Ije mỳj me'ô kute imã kabēja pumũnhmã 'ỳr akêx nhyim ngônhpôkti kubê 7 ne ku'ê ba omũ. Kẽn karỳro ngônhpôkti.

¹³Nhyim kam ipôkri dja. Kute me'ô my pyrâk ne dja. Nãm kubêkã ryti jadjàn o dja. Kubêkã rytija ne parkôn 'anh itep nhyim 'ã dja. Ne kẽn karỳro amirunh pren 'ã dja. ¹⁴Ne kĩ jaka: kute âk kaka jaka ja pyrâk. Kute kadjât nhĩ jaka pyrâk. Nhyim no pôkja kute kuwy pôk pyrâk. ¹⁵Ne par jadjênh. Kute ngôn nhipêx djâkam me kute 'ã ngrão pôx nhyim adjênh pyrâk. Nhyim ôkrekam krikrit kute ngô rârâkti: pyrâk. ¹⁶Ne ubôkjaio kanhêtireo 7 ne 'amỳn o dja nhyim kam aktã kâx djwa mextire ajkwa krekre kurũm kato. Ne nokre jadjênh kute kâjkwa nhipôkri myt mrânkhkam adjênh ja pyrâk.

¹⁷Ba omũn kam itu mỳrbê tỳm kute ityk pyrâk ne itu mỳrbê tỳm ne nũ, itĩn prãme. Nhyim kam ta ijã ikra dji, ubôko ijã ikra djĩn kam imã,

—Kwãrik wãnh atĩn prãm kêt. Ba ibê mỳjja kunĩ krax ne kam ajte ibê mỳjja kunĩ 'ênhôt. ¹⁸Bajbit ne ba ije amitĩn mar. Arỳm ne ba ty ne kam arỳm ajte itĩn ne. Amrê ipumũ. Ba dja ba itĩn rã'ã rã'ã. Ba ne ba ikabêno me tyk kadjy me anor djwỳnh ne kam ajte ikabêno me tyk nhô pyka'ỳr me anor djwỳnh.

¹⁹Aj, dja ga on 'ã pi'ôk no'ôk, aje omũnhja'ã pi'ôk no'ôk ne. Arỳm kator ga aje omũnhjamê mỳjja kraxje kator kêt rã'ãmê. Amê dja ga 'ã pi'ôk no'ôk ne. ²⁰Mỳkam ne ba kanhêtireo 7 idjubôko 'amỳn o dja ga omũ? Ne kẽn karỳro ngônhpôktio 7jadjwỳ, mỳj ne ja? Bir, ba amã arê ga ama. Ê, ngônhpôktio 7ja ne kubê apỹnh krĩ djari me kute amim imar ne kute ikôt aben pydji 'ã akre kubê 7. Apỹnh krĩkam me kute ikôt aben pydji'ã akre kubê 7 ne ja. Nhyim kanhêtireo 7ja ne kubê apỹnh krĩ djari me kute ijã abeno bikprônha kadjy mrânkh djwỳnh ta ne 'ã akre, ane.

Nãm ã Jeju imã kaběn ane ba kuma.

Epexukam ar ja arỳm kum Metĩndjwỳnh kĩnh ngrire.

2 ¹Nhyim kam ajte imã,
—Ê, ar kute krĩraxbê Epexukam amim imar ne kute ikôt aben pydjija kadjy mrânkh djwỳnhjamã dja ga pi'ôk no'ôk ne. Dja ga arkum

ikabên jarê. Ba ibê Bēnjadjwỳr Jeju dja ga arkum ikabên jarên arkum, “Ê, ba ije idjubôko kanhêtireo 7 ne 'amỳnhja, ne ba kên karỳro ngônhpôktio 7kam imrânha, ba. Ba ne ba ar amã ikabên ne.

²Gar ikabênkôt ar amijo aba ba arỳm omũ. Ar adjapênh rax, ar aje ijãno adjãm ne aje ikanga kêt ba arỳm omũn kam ikĩnhkumrêx. Nã gãm ar abê me axwe kĩnh no kati ba arỳm omũ. Nhym me wã we kute ‘Jeju kute ar ijanor’ anhỳrja gar te kabên mex jabej kam aman kam arỳm prĩne mekmã akato. Me wã ne me ‘êxnĩkumrêx. Me tãm ne gar arỳm mekmã akaton abê me kĩnh no kati. ³Nã gãm ar ijãno djan amibê ijo abiknor kêtumrêx ne. Nãm me ikôt ar ajo ajkê gar tu ate akrãn aje amibê ikanga kêt ba arỳm omũn kam ikĩnhkumrêx ne.

⁴Bep mỳjja pydji ne ba omũn ikapĩre. Amrêbê ar aje amim ijo amirĩt totokbê ne gar amã ijabê ne jakam arỳm amã ikĩnh ngrire. ⁵Gop ar amim akaton wãnh ajaxwemã anhiren iwỳr amijo akêx. Nã gãm ar ibê amiptàr mex ne. On ar ajte akubyn amã ijabên kam ajte akubyn imã apê kute amrêbê imã ar adjapênh ja pyræk. Dja gar ã anhỳr kêt ba wãm ar awỳr tẽn kam ar abê ngônhpôktiwiã kaba nhym arỳm ãm djã kaprỳ.

⁶Nhym bep me punubê Nikôrij, me tãm, me kabên punu ar baja. Me tãm ne gar me kabên punukam amã me kurêkumrêx. Mrãmri, kam ne mexkumrêx. Mrãmri ne gar amã me kabên punuja kurêkumrêx. Kam ne mexkumrêx. Badjwỳ ne ba imã mekbê Nikôrij me kabên punukam imã me kurêkumrêx.

⁷Gora ar ajamak mex jabej on ama. Metĩndjwỳnh Karô ne ar kute amim imar ne apỳnh kute ikôt aben pydjijamã kabên. Gora ar prĩne kabên ja ma. Ê, ar me kuràm atỳx ne aje ijãno adjãm, ar gajbit dja ba ar amã pidjô kute meo tĩnja jarê gar gajbit ku. Pidjô kute meo tĩnja ne Metĩndjwỳnh nhô pykakam dja, kãjkwakam Metĩndjwỳnh nhô pyka mexkumrêxkam. Tãm dja gar ku”, ane. Nãm ã Jeju imã kabên ane. Ba ibê Djuão ne ba kuman ar amã arê.

Emĩnakam ar ja tokry.

⁸Nhym kam Jeju ta ajte imã,

—Ê, krĩraxe Emĩnakam ar kute amim imar ne kute ikôt aben pydjija kadjy mrãnh djwỳnhjamã dja ga pi'ôk no'ôk ne. Dja ga arkum ikabên jarê. Ba ibê Bēnjadjwỳr Jeju dja ga arkum ikabên jarên arkum, “Ê, ba ibê mỳjja kunĩ krax ne kam ajte ibê mỳjja kunĩ 'ênhôt. Ba ne ba tyn kam ajte itĩn ne. Ba ne ba ar amã ikabên ne.

⁹Me kute ar ajo bikênha ne ba arỳm omũ. Ar anhô mỳjja kêt, anhô nèkrêx kêtja ne ba arỳm omũ. Nhym bep kati, nĩjar anhô nèkrêx kumex. Mrãmri pykakam ar abakam arỳm anhô mỳjja kêt nhym bep kãjkwakam anhô mỳjja kumex. Nhym me kwỳ ta amijo Metĩndjwỳnh kra, amijo mekbê idjaer ne ar ajaprỳ ar o ba, ba arỳm omũ. Djãm mekbê Metĩndjwỳnh kra? Kati, Xatanaj nhô àpênh ne wã ne kam mã kôt ar aben pydjio ba. ¹⁰Kwãrĩk wãnh gar amã me uma kêt. Gora ar atỳx. Dja me ã ar ajo ajkê ga ar atokry. Gora ar atĩn prãm kêt. Ê, godja me ã Xatanajbê me axwe nhô bēnjadjwỳr kabênkôt mekbê

ijê djâkam ar akwÿ rê, ar aje ikanga jabej. Be, akati kunîkôt dja me ar ajo ajkê gar atokry. Nhyam kam arÿm me kute ar ajo bikênh'â akatibê 10 nhyam kam me arÿm ar ajo bikênh kêt ne. Gora ar ijâ angrâ tÿx ne ijâno dja. Godja me te ar apa gar ijâno dja ba kam pân̄h ar ajo tîn gar atîn rā'ā rā'ā.

¹¹ Gora ar ajamak mex jabej, on ama. Metîndjwÿnh Karô ne ar kute amim imar ne apÿnh kute ikôt aben pydjijamā kabên. Gora ar prîne kabên ja ma. Ê, ar me kurâm atÿx ne aje ijâno adjāmja, ar gajbit dja gar atyk nhijukri ajte atyk kêtumrêx. Arkati”, ane. Nām ā Jeju imā kabên ane. Ba ibê Djuão ne ba kuman ar amā arê.

Pegamukam ar ja kwÿ prô prām.

¹² Nhyam kam Jeju ta ajte imā,

—Ê, ar kute krîraxbê Pegamukam amim imar ne kute ikôt aben pydjija kadjy mrân̄h djwÿnhjamā dja ga pi'ôk no'ôk ne. Dja ga arkum ikabên jarê. Ba ibê Bênjadjwÿr Jeju dja ga arkum ikabên jarên arkum, “Ê, ba ne ba ar amā ikabên. Ba ijajkwa krekre kurûm aktâ kâx djwa mextire kator djwÿnh, ba ne ba ar amā ikabên ne.

¹³ Xatanaj kute meo ba djâkam ne gar te ar aban amex rā'ā ba arÿm ar apumû. Be, nā gām ar ijâ angrâ tÿx ne aje amibê ikanga kêt. Djâ nā gām ar me kudjwa aminêje memā kum, ‘Jakam arÿm ije amim Jeju mar kêt. Arÿm imā kînh kêt’, ane? Kati, ar aje ā memā anhÿr kêtumrêx. Nhyam me arÿm ar anhôbikwa Āxipanh bî gar mā amā ikînh ne aje ikanga kêtumrêx ne. Nā, Āxipanhdjwÿ kum me uma kêt ne tu memā ijarênh 'āno dja nhyam me kubî, wākam, Xatanaj môr djâ wākam. Nām me te kubî gar mā amā ikînh ne. Ba arÿm omûn ar akam ikînh ne.

¹⁴ Bep me kute me kabên punukôt amijo ba ja tām ne ba imā me kînh kêt. Ar akwÿ ne gar me bakukāmāre 'ôbê Barāokôt ar amijo aba. Djām Barāo mex got. Nām mekbê idjaer kurê djwÿnhbê Barakimā mekbê idjaer'ā karô. Kute mekbê idjaer o bikênhmā ne mÿjja punu'ā kum karô. Mekbê idjaer kute mry punu krên̄mā, me kute mÿjjao Metîndjwÿnh karô nhîpêxjamā mry nhôr ja kute krên̄ ne amijo bikênhmā. Ne ajte me kute abenbê prôo âkînh ne arîk prô prāmo kumexmā. Me kute ā amijo bikênh o anhÿrmā ne me'ā kum karô. Nhyam kam ô'ā Baraki mekbê idjaero bikênh o ba. ¹⁵ Nhyam ar akamdjwÿ mekbê Nikôrij ā kabên ane, ā memā 'ā karôo ane. Nhyam ar akwÿ kabên punu jakôt ar amijo ba.

¹⁶ On ar amim akaton wānh ajaxwemā anhîren iwÿr amijo akêx. Dja gar amim akator kêt ba ar awÿr bôx ne me kabên punuja'ÿr iprôt ne. Ijajkwa krekre kurûm aktâ kâxdjwa mextire katorjao dja ba me'ÿr iprôt ne.

¹⁷ Gora ar ajamak mex jabej on ama. Metîndjwÿnh Karô ne ar kute amim imar ne apÿnh kute ikôt aben pydjijamā kabên. Gora ar prîne kabên ja ma. Ê, ar me kurâm atÿx ne aje ijâno adjāmja, ar gajbit dja ba ar amā djwÿbê mÿj ne ja ngā, djwÿo bipdjurja ngā gar krê. Ba kam ajte ar atÿxmābit apÿnh kên mêre, kên jaka ngā. Ne kam ajte ar amā kên ja no'ôk, apÿnh ar anhidji ny'ā kên no'ôk

ne kungã gar kam omũ. Atemã me ja kute ar anhidji nyja mar kêt. Ar gajbit, ar atÿxbit, ije apÿnh ar amã kên nhôrja, ar gajbit dja gar apÿnh aminhidji nyja ma”, ane. Nãm ã Jeju imã kabên ane. Ba ibê Djuão ne ba kuman ar amã arê.

Xijxirakam Djedjabeu ar noo akno.

¹⁸Nhym kam Jeju ta ajte imã,

—Ê, ar kute krîraxbê Xijxirakam amim imar ne kute ikôt aben pydjija kadjy mrânê djwÿnhjamã dja ga pi'ôk no'ôk ne. Dja ga arkum ikabên jarê. Ba ibê Bênjadjwÿr Jeju dja ga arkum ikabên jarên arkum, “Ba ne ba ar amã ikabên ne. Ê, ba, ibê ne Metîndjwÿnh kra ne ino pôk kute kuwy pôk pyrâk, ne ipar jadjênê kute ngônê nhîpêx djâkam me kute 'ã ngrão pôx nhym adjênê pyrâk, ba ne ba ar amã ikabên ne.

¹⁹Gar kôt amijo aba, ba arÿm omũn kam ikînhkumrêx. Gar amã aben jabên amã Metîndjwÿnh jabê ba arÿm omũ. Gar tu amim imarkumrêx ne ijã angrã tÿx ba arÿm omũ. Ar adjâpênê rax ba arÿm omũ. Nã gãm ar ijãno djan amibê ikanga kêtumrêx ba arÿm omũ. Nã gãm ar ikôt amijo aba. Amrêbê ne gar ikôt amijo aba ngrîre ne kam amijo tên amijo tên arÿm ikôt amijo amôr mex ne.

²⁰Nhym bep mÿjja pydji ne ba omũn ikaprîre. Nã gãm ar amã me'ô nibê Djedjabeu kînh. Nãm we amijo Metîndjwÿnh kabên jarênê djwÿnh ne kam mÿjja punu'ã inhô âpênêhmã karôn 'ã arkum apnê. Inhô âpênê kute abenbê prôo âkînh ne ar prô prâm ba ne kam kute amijo bikênêhmã.

Ne kam ajte ar kute mry punu krênêhmã, me kute mÿjjao we Metîndjwÿnh karô nhîpêxjamã kute mry nhôr nhym ar kute krên ne o kute amijo bikênêhmã. Nãm ã Djedjabeu inhô âpênêhmã mÿjja punu'ã karôo ane, ne ã 'ã arkum âpnênêho ane. ²¹Nã bãm te amiwÿr kam ama. Kute amim kator ne wânê axwemã irern iwÿr amijo akêxmã te amiwÿr kam ama nhym kute mjên prâm ja kanga kêt ne amim kator kêtumrêx. Kum axwe kînh rã'ã:.

²²Ê, dja ba nija'ÿr bôx ne kam nôr djâkam kumê, nôr djã tãmkam dja ba kumên kam prîne o ajkê. Me my kute nînhjamê ro'ã dja ba prîne meo ajkê. Dja me kum axwe kînh rã'ã ne nija kanga kêt ne iwÿr amijo akêx kêt, ba kam prîne meo ajkê nhym me kam tokry. ²³Ne ni krajadjwÿ pyka mê o amrã. Apÿnh ar aje amim imar ne ikôt aben pydjija kunî aje imã akator kadjy. Ba ije ar ajamakkre kadjwÿnhbêmê anhôkre kadjwÿnhbê aje mÿjja mex nâr mÿjja punu'ã amim karô jabej ije ar akamũnh ne kôt ije ar anhî pÿnhkôt ar amã o pânê djwÿnh. Gar kôt aje imã akator kadjy dja ba ni krajadjwÿ pyka mê o amrã.

²⁴Bep ar aje me kabên punukôt amijo aba kêtjamã, wâkam, Xijxirakam ar aje me kabên punu kôt amijo aba kêtjamã dja ba ajte ikabên 'ô jarênê kêt. Mrâmri ne ar aje ikôt amijo aba ne ar aje Xatanaj kukràdjã mar prâm kêtam amexkumrêx. Nhym me ate we kute Xatanaj kukràdjã bipdjurja marmã we, ‘Mexkumrêx gu me kuma’, anhÿrja djãm me mex got. Axwe punu gar kôt amijo aba kêtam amexkumrêx. ²⁵Gora ar mã ikôt ar amijo aban ijã angrã tÿx rã'ã: ba akubyn bôx.

26-28 Ë, ar me kuràm atÿx ne aje ijãno adjãmja, ar aje ikabên mar ne aje ikôt amijo aba rã'ãn aje o atêm ne o atêm ne arÿm aje inomã mênha, ar ajã dja ba bënjadjwÿr rë gar kam inhijuk'ã meo aba.

'Apÿnh me ba djari dja gar meo aba, ar apymao meo aban meo aba tÿx ne. Meo aba tÿx ne, nhym me'õ axwe gar kam prïne o ajkë, me kute kàxo àbêr djào kute ngyo ngônhtotyky ne prïne ka'êkja pyræk. Dja gar ã meo aba tÿxo ane.'

Be, Ibãmbê Metîndjwÿnh ne ijã bënjadjwÿr mē. Dja ba kam amidjô'ã ar ajã kurë gar kam ikabênkôt meo aba. Dja ba kam ajte ar akînh djã kadjy ar amã umajÿrtiredjwÿ ngã, akati maktã umajÿrtire ja ngã.

²⁹Gora ar ajamak mex jabej on ama. Metîndjwÿnh Karô ne ar kute amim imar ne apÿnh kute ikôt aben pydjijamã kabên ne. Gora ar prïne kabên ja ma", ane. Nãm ã Jeju imã kabên ane. Ba ibê Djuão ne ba kuman ar amã arë.

Xadjikam ar ja kute me tyk pyræk.

3 ¹Nhym kam Jeju ta ajte imã,
—Ë, ar kute krîraxbê Xadjikam amim imar ne kute ikôt aben pydjija kadjy mrãnh djwÿnhjamã dja ga pi'òk no'òk ne. Dja ga arkum ikabên jarë. Ba ibê Bënjadjwÿr Jeju dja ga arkum ikabên jarên arkum, "Ë, ba ne ba ar amã ikabên. Ba ije Metîndjwÿnh Karô kute amijo 7 ije amÿnhja, ne ije kanhêtireo 7 ne amÿnhja, ba. Ba ne ba ar amã ikabên ne.

Nãm me we ar amex jarë. Bep kati, ar ajaxwekam kute ar atyk pyræk. Ba arÿm ar apumû. ²On ar ano mex, atîn rã'ãri, ne akubyn amijo tÿx, amijo mex, ar atyk kêtî. Nã gãm ar amijo aba punu ba te ar apumû, te ar aje kôt amijo aba jabej te ar apumû ne kam ar amã, 'Ë, Ibãmbê Metîndjwÿnhmã ar amex kêtumrëx', ane.

³Gop ar ajkam ama. Amrêbê me kute ar amã arênh gar arÿm aje markumrëx tãm dja gar tu markumrëx ne kôt amijo aba. Kôt amijo aban on wãnh ajaxwemã anhiren iwÿr amijo akëx. Dja gar amim akator kêt ba kam ar ajaêrbê ar awÿr bôx. Kute me àkînhî me aêrbê kute mÿjjao àkînh ne kute mebê mÿjja jamÿnh ja pyræk. Dja ba ã ar ajaêrbê ar awÿr ibôxo ane. Dja gar ibôx djãkôt imar kêtumrëx ba ar ajaêrbê bôx.

⁴Bep krîbê Xadjiwākam ar angrêre ne gar amrãnh mexkumrëx rã'ã. Ne kam ar angrêre amrãnh mexkumrëx kute mrãmri ne me kute kubêkà mex, 'ã ngrã kêt kute angjênh ne 'ã mrãnhja pyræk. Nã gãm ar ã amexo ane. Ar ga dja gar ikôt mrãn ikudjwa kubêkà jaka jangij ne 'ã mrã. Nã gãm ar amrãnh mexkumrëx. Nhym kam kubêkà jaka kadjy ar amex. Tãm dja gar angij, amrãnh mex pãnh angijn 'ã mrã.

⁵Be, ar me kuràm atÿx ne aje ijãno adjãmjabit dja gar ã kubêkà jaka jangjênh ne 'ã amrãnh ane. Ba kam pi'òk no'òkkam anhidji jarijwã o ibingrànht kêt, me tîn rã'ã rã'ã'ã pi'òk no'òkkam ar anhidjio ibingrànht kêt ne. Ne kam ajte dja ba Ibãmmã inhÿtã ar ajarë, Ibãmmê Ibãm kadjy mrãnh djwÿnhmê arkum inhÿtã tu kàj bê ar ajarë ne kum, 'Be, inhô me ja ne me ja.' Be, dja ba ã kum ane.

⁶Gora ar ajamak mex jabej on ama. Metĩndjwŷnh Karõ ne ar kute amim imar ne apŷnh kute ikõt aben pydjijamã kabĕn ne. Gora ar prĩne kabĕn ja ma”, ane. Nãm ã Jeju imã kabĕn ane. Ba ibĕ Djuão ne ba kuman ar amã arĕ.

Pirapijkam ar Metĩndjwŷnh kabĕnkõt amijo ba.

⁷Nhym kam Jeju ta ajte imã,

—Ē, ar kute krĩraxbĕ Pirapijkam amim imar ne kute ikõt aben pydjija kadjj mrãnh djwŷnhjamã dja ga pi'òk no'òk ne. Dja ga arkum ikabĕn jarĕ. Ba ibĕ Bĕnjadjwŷr Jeju dja ga arkum ikabĕn jarĕn arkum, “Ē, ba ne ba ar amã ikabĕn. Ba imexo ipyma ne mrãmri ikabĕnkumrĕx ne ijĕxnhi kĕtkumrĕx ne kam ar amã, 'Ba ne ba ije inhingĕt kukãmã Dawi nhũrkwākam o kajkep djwŷnh. Ba kikre'ã kuta nhym mŷj me'õ godja 'ã ijĕ? Ba 'ã ijĕ nhym mŷj me'õ godja 'ã kuta?’

⁸Bir be, gar ikõt amijo aba ba arŷm omũ. Djã nã gãm ar atŷx kumrĕx? Kati, kàjbĕ ar atŷx ba arŷm ar apumũ. Nã gãm ar te atŷx ngriren mã ikabĕnkõt ar amijo aban aje ikanga kĕtkumrĕx ba kam ar amã, 'Ba gĕdja ba ar amã kikre'ã kuta. Mŷj me'õ gĕdja ar abĕ 'ã ijĕ? Ba dja ba ar ajo iba. Mŷj me'õ dja inĕ?’ ane.

⁹Ē, Xatanaj nhõ àpĕnh 'ĕxnhija, kute kõt ar aben pydjio ba, ne me 'ĕx ne amijo Metĩndjwŷnh kra, kute amijo mekbĕ idjaer, djãm mekbĕ idjaer djwŷnh got, me ja me tãm gĕdja ba ar awŷr me pa 'amŷn meo mōn ar akuka kōnh me umjuw nhym me kam pijãm djaje ar akuka kōnh ibōn krĩn ar amã arax jarĕn kam tu ar amarkumrĕx. Imã ar ajabĕkam kõt me kute mar ne kute ar ajã, 'Jeju kum ar abĕja pumũ', anhŷr kadjj dja ba ã meo ane.

¹⁰Ije ar amã, 'Dja me te ar ajo ajkĕ gora gar mã ijã angrã tŷx ne ijãno djan ikanga kĕt', anhŷrkõt ne gar amijo aba. Nhym me te ar ajo ajkĕ gar mrãmri ijãno djan ikanga kĕt. Kam dja ba ar apytã. Ije me kunĩo ibikĕnhkam dja ba arŷm ar apytã. Dja ba pyka kunĩkõt ije me kabi kadjj meo ajkĕ. Dja ba apŷnh pyka djari me kunĩ kabi, me kute imã kator kadjj me kabin meo ajkĕ. Nhym bep ar amexbit dja ba ar apytã.

¹¹Arŷm ibōx 'ŷr. Gora ar arek ikabĕnkõt ar amijo aba rã'ã: ba kam ar amã o pãnh, ar amã ar akĩnh djã ngã. Kwārĩk wãnh me'õ ar abĕ ikurĕ kĕt. Dja me'õ ar anoo aknon ar abĕ ikurĕ gar kam akĩnh djã bŷr kĕt ne. Dja gar arek amijo aban arŷm ikam amim akĩnh djã by.

¹²Ē, ar me kurãm atŷx ne aje ijãno adjãm, ar gajbit dja ba amim ar apumjuw, Ibãmbĕ Metĩndjwŷnh nhũrkwãtikam ar apumjuw gar aku'ĕ rã'ã rã'ã, kute Metĩndjwŷnh nhũrkwãtikam par pyrãk ne aku'ĕ, Metĩndjwŷnh kuka kōnh aku'ĕ rã'ã rã'an akator kĕt. Ba dja ba ar ajã Ibãmbĕ Metĩndjwŷnh nhidji no'òk, ne kam ajte ar ajã krĩ nhidji no'òk, Ibãmbĕ Metĩndjwŷnh nhõ krĩ mex nhidji dja ba ar ajã no'òk ne. Krĩ mexja, Djeruxarĕ nyja, Ibãmbĕ Metĩndjwŷnh kurũm rwŷkja, kàjkwa kurũm rwŷk, ja tãm nhidji dja ba ar ajã no'òk ne. Ne kam ajte ba aminhidji ny ar ajã no'òk ne, ar atŷx ne aje ijãno adjãmja'ã aminhidji no'òk ne.

¹³Gora ar ajamak mex jabej on ama. Metĩndjwỳnh Karô ne ar kute amim imar ne apỳnh kute ikôt aben pydjijamã kabẽn. Gora prĩne kabẽn ja ma”, ane. Nãm ã Jeju imã kabẽn ane. Ba ibê Djuão ne ba kuman ar amã arẽ.

Raodjikam ar kute ngô kàjbê kangro pyræk.

¹⁴Nhym kam Jeju ta ajte imã,

—Ê, ar kute krĩraxbê Raodjikam amim imar ne kute ikôt aben pydjija kadjy mrãnh djwỳnhjamã dja ga pi'ôk no'ôk ne. Dja ga arkum ikabẽn jarẽ. Ba ibê Bẽnjadjwỳr Jeju dja ga arkum ikabẽn jarẽn arkum, “Ê, ba ne ba ar amã ikabẽn. Ba, ibê ne Mrãmri. Ba ije mrãmri katàt memã Metĩndjwỳnh kabẽno amirĩt djwỳnh ne ba mrãmri ikabẽnkumrẽx. Metĩndjwỳnh kabẽnkôt ne ba ibê mỳjja kunĩ nhipêx djwỳnh.

¹⁵Gar ar aba ba arỳm ar apumũ. Djãm we ar amã ikurê nàr kon djãm we ar amã ijabê. Arkati. Nã gãm ar amã ikurê kêt ne kam ajte amã ijabê kêt. Ar aje ngô kàjbê kangro pyræk, ajakry kêt ne kam ajte akangro kêt. Gop on ar ajakry nàr kon on akangro rax. Ba gop kôt kuma, ar apunu ma nàr kon ar amex ma.

¹⁶Nhym bep kati, ar kàjbê akangrokam ije ar amar mex kêt. Kam dja ba ar ajo aptô. Ar ajakry kêt ne ar akangro kêt ne aje ngô kangro kajgo pyrækkam.

¹⁷Nã gãm we ar, ‘Arỳm ne inhô nèkrêx kumex. Nã bãm prĩne inhô mỳjjao aptã nhym kam kumex. Arỳm inhô mỳjja kunĩ bikàr ne ibê 'ô'ã kàtàm kêt.’

Kê, djãm ar aje amimar got. Nã gãm ar prĩne amijo ajkê. Ne akapri mex ne. Ne abikênh mex ne. Ar ano rã ne anhô kubêkà kêt kam tu irãri ar abajakam. Djãm ar aje amimar kêt? ¹⁸Kam dja ba ar amã mỳjja jarẽn ar amã, ‘Ê, on kên karỳr mextireja, ngôn nhipêx djàkam me kute 'ã ngrão pôx nhym mextire ja dja gar 'ã ijjwỳ ba ar amã kungã gar abyn arỳm amimex, arỳm abikênh kêt. Ne kam ajte ar kubêkà jaka'ã ijjwỳ ba ar amã kungã gar kam arỳm angjê. Angjên irãri ar aba kêt kam apijàm kêt. Ne kam ajte ar anokam pidjy'ã ijjwỳ ba ar amã kungã gar arỳm o amino dji ne arỳm ano mex.’

¹⁹Me axwe nêje ne ba memã ibên tỳx ne imã me kĩnhja ne ba memã uwêk màt ne. Kam dja gar on amim akaton wãnh ajaxwemã anhiren akubyn iwỳr amijo akêx.

²⁰Ê, gop ar ikabẽn ma. Ota ba arỳm ar awỳr bôx ne kikre kabem dja. Ar ajô imã kikre'ã ta. Ba wãm awỳr wadjà gu baro'ã aben kuka kôn nhanhô kwỳ krêno nhỹ ga arỳm akĩ:nhkumrẽx. Gop ar ajô aje ikabẽn mar jabej, on kikre'ã ta.” Nãm ã Jeju me kunĩmã kabẽn ane. Me kute Jejao aminhômã ne ã kabẽn jarênho ane ne kam ajte memã kum,

²¹“Ê, me me kuràm atỳx ne aje ijãno adjãmja, me gajbit dja ba me amã arẽ ga me ikrĩ djàkam inhikô'ã nhỹ. Me ga dja gu me ar meo baban bakabêno me ano. Me me bamã àpênhmã dja gu me bakabêno me anor ar o baba. Ga ba itỳx ne ije Ibãm 'ãno idjãm ne ije amijo imrãnh rã'an ije aminhinomã amimênhja pumũ. Ije kanga kêt ne ije aminhinomã amimênh ne kam Ibãm nhikô'ã inhỹr ne ije ikabêno me anorja pumũ. Dja ga me ã ikudjwa atỳx ne ijãno adjãmno ane.

²²Gora me ajamak mex jabej on ama. Metĩndjwỳnh Karõ ne mete amim imar ne apỳnh kute ikõt aben pydjijamã kabẽn. Gora prĩne kabẽn ja ma”, ane. Nãm ã Jeju imã kabẽn anen kam o ino re. Ba ibê Djuão ne ba kuman me amã arẽ.

Metĩndjwỳnh krĩ djàtikam nhỹ.

4 ¹Nhym kam ijukri atemã mỳjja kato ba omũ. Kàjkwakam kikre'ã 'yr ne dja ba omũ. Nhym kam ajte me'õ imã kabẽn ne, õbê kute imã kabẽnja, kabẽn kute poti kakõr tỳx pyràk, ta ajte imã kabẽn ne imã,
—Amrẽ tẽ ba amã mỳjja jakre, mỳjja kraxje kator kêt dja ba anhyr djwỳnhràam amã o amirĩt ga anoo anhytã omũ nhym bep tũmràm dja amirĩt ne, ane. Nãm ã imã ane.

²Ã imã anhyrmẽ ro'ã Metĩndjwỳnh Karõ iwỳr ruw ne mã ijo tẽn ijo wabi. Nhym nĩjar kàjkwakam bẽnjadwỳr krĩ djà rax dja nhym kam arỳm me'õ kam nhỹ. ³Me'õ ỳrja ne adjẽnho tuknĩ. Kute kẽn ngrãngrãmẽ kẽn kamrêk kakrãtyk, o me ikrakam ràx ne o òkredjê karỳr jadjẽn tỳx ja pyràk. Nãm ã me'õ ỳrja jadjẽn kute kẽn ja jadjẽnja pyràk ne nhỹ. Nhym kam djwỳngwỳnh tire ne krĩ djãmã ipòk ne wajêt ne kam adjwỳnhdjwỳ adjẽn. Kute atemã kẽn ngrãngrã 'òdjwỳ jadjẽn tỳx ja pyràk. Nãm ã djwỳngwỳnh tire adjẽn ã anen krĩ djà raxmã ipòk ne.

⁴Nhym krĩ djà raxjamã me krĩ djà kryre ipòk ne. Apỳnh me krĩ djà kryre ku'ê djàri 'ã akrekam kubê 24. Nhym mebêngête kam krĩ. Kubêkã jaka jangij ne kam kam krĩ. Ne kẽn karỳro krãdjê, bẽnjadwỳr krãdjê ne me kutu.

⁵Nhym krĩ djà raxja kurũm adjẽnho amikurwỳ ne kam krako dja. Kabẽnme adjẽnhmẽ krakmẽ o akã. Nhym krĩ djà rax kabem ne ngõnhpòktio 7 ne pòko ku'ê. Ngõnhpòktija kubê Metĩndjwỳnh Karõ kute amijo 7ja. ⁶Nhym ajte krĩ djà rax kabem ne mỳjja karỳr kute imõtĩ pyràk ne nõ. Kute ixeo imõtĩ pyràk ne nõ. Karỳr kute kryt karỳr pyràk ne nõ.

Nhym mỳjja tĩn amãnhkrut ne amãnhkrut ne krĩ djà raxmã ipòk ne, nhym ipòkri krĩ djà rax dja. Nhym mỳjja tĩnja kute krĩ djãmã ipòkja ikam no kumex, ibũmkam non õngàkkam no. ⁷Nhym mỳjja tĩn kutewaja kute rop djàkrêbê rijão pyràk, atãri ja kute mryti kra pyràk, atãri ja nokre kute mebêngòkre^a nokre pyràk nhym kute katēja kute àkkajkritti tor pyràk. ⁸Nhym apỳnh mỳjja tĩn djàri ara kumex. Ar ì pỳnhkõt ara kubê 6'ã kabẽn. Nhym arakam no kumex. Ara nhibũmkam no. Ara nhòkrekam no.

Ne ar ngrer ba. Ngrer ba rã'ã rã'ã. Kute ngrero ino rer kêtumrêx. A'urimẽ akamãtmẽ kam ar ngrer ba rã'ã rã'ã. Nãm ar,

—Mex, mex, mex. Metĩndjwỳnh ne mexo umakumrêx. Nãm Bẽnjadwỳr raxkumrêx. Tỳxo kubê kumkati. Nãm tĩn ne ar ba, amrêbê adjakamã tĩn ne ar ba. Dja mrãmri tĩn rã'ã rã'ã.

^a4.7 Apỳnh me õ pyka djàri kunĩkõt ne me kunĩ bêngòkre. Kubêkã jakamẽ me kakrãtykmẽ me babêngòkremẽ ne me kunĩ: bêngòkre.

Nãm ã ar ngrero ane, ã kute kum mex jarênho ane. ⁹⁻¹⁰Mỳjja tĩn amãnhkrut ne amãnhkrutja ã kute krĩ djà raxkam ýrjamã mexmẽ umamẽ raxmẽ amikĩnh jarênho ane. Metĩndjwỳnh tĩn ne ar ba rã'ã rã'ajamã arẽ. Ar kute kum arênh kunikôt ne mebêngêtte kubê 24ja tu mỳrbê rôrôk ne. Krĩ djà raxkam ýrja kabem, pijàm djaje tu mỳrbê rôrôk ne. Mrãmri ne Metĩndjwỳnh tỳxkumrêx ne tĩn rã'ã: rã'ã. Kam ne kuka kôn̄h mebêngêtte kubê 24ja pijàm djaje tu mỳrbê rôrôk ne. Ne kam tu kabem krãdjê mexjamã ire. Tu kabem krãdjê mexjamã ire nhym wãnh ikwã. Nhym me kam kum mex jarẽ. Kum mex jarẽ ne kum,

¹¹ —Me inhô Bẽnjadjwỳr, me Itĩn djwỳnh, gajbit ne ba me amã amextire jarên amã apymamẽ arax jarên amã atỳx jarẽ.

Mỳj me'ômẽ ne gar aje aben pyrãk? Kati, apydji.

Gajbit ne ga mỳjja kunĩ 'y.

Gajbit ne ga tu amim mỳjja kunĩ'ã karô nhym arỳm tĩn ne apôx. Ga ne ga mỳjja nhipêx nhym apôx, ane.

Nãm ã mebêngêtte kubê 24ja Metĩndjwỳnhmã mextire jarênho ane.

Mrykĩ'átomti jabatàn̄h nyre kute pi'ôk byr.

5 ¹Nhym kam krĩ djà raxkam ýrja ubôko pi'ôk no'ôk byn o nhỹ ba omũ. Nãm prĩne pi'ôk no'ôko tuknĩ. Ôkremẽ ibũmmẽ prĩne no'ôk. Ne kam krãkã'ã tom krĩo tẽ. Abenmã mên̄h'ã tom krĩo tẽ. 'Ã tom'ã akre kubê 7. Me'ô kute 'ãpre bôn̄h ne omũnh kêt kadjy. ²Nhym kam kadjy mrãn̄h djwỳnh tỳxkumrêx ne katon kàj bê memã kabên ne memã kum, —Mỳj me'ô ne mexkumrêx ne kam kute pi'ôk no'ôkja'ã 'yrmã? Kute 'ã oy djà rên̄hmã? ane. ³Nãm ã anen kam te me'ô mex jabej me kabi. Kute pi'ôk no'ôk'ã oy djà rên̄h ne omũnhmã. Nãm kàjkwakammẽ pykakammẽ pyka kadjwỳnhbê me jamẽ te kadjy me kabi. Ne me'ômã kator kêt̄kumrêx. ⁴Kam ne ba arỳm muw. Me'ô mexkumrêx kute pi'ôk no'ôk'ã 'yr ne omũnh 'ô kêt̄kam ne ba arỳm imỳro dja.

⁵Nhym kam mebêngêtte 'ô imã,

—Amỳr kêt. Ê, Djuda nhũrkwãkam me'ô, Dawi tãmdjwỳ 'ô dja pi'ôk no'ôk'ã kuta. Tỳxkumrêx, umakumrêx. Kute rop djãkrêbê rijão pyrãk. Tãm, ajbit, ne tỳxkumrêx ne meo apan kam kute pi'ôk no'ôk'ã oy djãbê 7 rên̄h ne kute pi'ôk no'ôk'ã 'yr ne kute omũnhmã.

Nãm ã imã ane ba kam kuma.

⁶Nhym kam Metĩndjwỳnh krĩ djãti nhipókri Mrykĩ'átomti jabatàn̄h nyja dja ba omũ. Nhym kam kute me kute Mrykĩ'átomti jabatàn̄h nyja bĩn nhym ajte akubyn tĩn pyrãk. Nhym mỳjja tĩn amãnhkrut ne amãnhkrutjamẽ mebêngêttẽ Metĩndjwỳnh krĩ djãtikam Mrykĩ'átomti jabatàn̄h ny djãmjamã ipôk ne dja. Nhym Mrykĩ'átomti bario 7 ne kam noo 7. Noo 7ja kubê Metĩndjwỳnh Karô kute amijo 7, tãm ne pyka kunikôt ar mrã. ⁷Nhym kam Mrykĩ'átomti jabatàn̄h nyja tẽn kubê pi'ôk no'ôk by. Krĩ djãtikam ýrja ne ubôko kum kungã nhym kubê kuby.

⁸Nhym byrmẽ ro'ã mỳjja tĩn amãnhkrut ne amãnhkrutmẽ mebêngêtte kubê 24jamẽ kabem tu mỳrbê rôrôk ne. Apỹnh ô pĩjãbãre. Atemã pĩjãbãre

djê krăptĩ. Ne apỹnh ò ngôn̄h. Kẽn karỳro ngôn̄h. Ngôn̄h ja ne ipun dja. Kikre kudjỳ djà ne kam ipu ne. Mỳjbê ne kikre kudjỳ djà? Me kabẽn. Metĩndjwỹnh nhõ me ja kute kum kabẽn'ã ne kikre kudjỳ djà amijakre.

9-10 Be, mebêngêtte nhõ pĩjăbăremẽ ngôn̄h ipujamẽ ne me amỹn kam ngrer ba. Ngrer ny ne me arẽnho ba, ne,

—Gajbit apydji ne ga amex ne aje pi'òk no'òk byrmă. Ga dja ga pi'òk no'òk byn 'ã ta. Arỹm ne me abĩ ga kam arỹm akamrôo meo pân̄h ne me pa 'amỹn me utàn Metĩndjwỹnh'ỹr meo tẽ. Nă găm me kwỳ ra:x ne me utà. Apỹnh mebêngôkre ba djări, apỹnh amyngràri me ba djări, apỹnh me kabẽn djări, apỹnh me ò pyka djări kunĩkôt ne ga me kwỳ pytàn Abămmă me umjuw.

Nhym me kam kubê me kadjy Metĩndjwỹnh mar djwỹnh ne me banhõ Metĩndjwỹnhmă àpẽn̄h ba. Dja me Metĩndjwỹnh djô'ă prĩne pykabê me ja o ba, ane.

Năm ă mebêngêtte ar ngrer ba ane.

11 Ba kam ajte omũn kam me kanga ma, kadjy mrân̄h djwỹnh kanga ma. Me krăptĩ kute pi'ô pyrăk. Kubê 1.000.000 krăptĩ. Me'ă akre krăptĩ: ne ba omũn kuma. Djăm me krăre got. Năm me krĩ djătĩmẽ mỳjja tĩnmẽ mebêngêttẽmẽ kum ipòk ne. Ne kàj bẽ kabẽn̄o kumex, ne,

12 —Mrămri ne ga gajbit amex. Mỳj me'ô got kute apyrăk?

Gajbit ne ga amexo me kunĩ jakre nhym me abĩ. Abẽ mrykĩ'ătomti jabatàn̄h ny prăbê abĩ.

Nhym kam Metĩndjwỹnh arỹm ajă bẽnjadjwỹr rax mẽ. Nhym kam apỹnh me pyka djări kute ò nêkrêx amă kumex ga aje ar o abamă. Ga gajbit ano mex ne atỹx. Gêdja me amim ajarẽn ajo rax ne kăjmă akamẽn abenmă araxo amirĩt, ane.

Năm ă kadjy mrân̄h djwỹnh kabẽn ane.

13 Nhym kam mỳjja kunĩ kabẽn ne. Nhỹnh ne mỳjja 'ô kabẽn kêt ne? Kati, kàjkwakam mỳjjamẽ pykakam mỳjjamẽ pyka kadjwỹnhbê mỳjjamẽ ngô raxbê pyka kêt kam mỳjjamẽ kunĩ ne ro'ă kabẽn ne,

—Gora gẽ me abenmă krĩ djătĩkam ỹrjamẽ Mrykĩ'ătomti jabatàn̄h nymẽ ar arẽ ne abenmă ar raxo amirĩt ne kăjmă ar kamẽ. Ar ajbit ne ar tỹx.

Gora gẽ me abenmă ar arẽ. Arkum rax jarẽn̄h rălă rălă ne.

Năm ă mỳjja kunĩ kabẽn ane ba kuma.

14 Nhym kam mỳjja tĩn amân̄hkrut ne amân̄hkrutja kôt kabẽn ne,

—Mrămri godja ă ane.

Nhym mebêngêtte kôt tu mỳrbê rôrôk ne adjwỹnhdjwỹ kum rax jarẽ.

Kute pi'òk no'òk'ă o y djà rẽn̄h.

6 1 Ba ibê Djuão ne ba arek omũnho dja. Nhym kam Mrykĩ'ătomti jabatàn̄h nyja pi'òk no'òk'ă oy djà ta ba omũ. Nhym kam mỳjja tĩn amân̄hkrut ne amân̄hkrut kumrêxja imă kabẽn. Kabẽn kute na krak pyrăk ba kuma. Nhym imă,

—Amrê tẽ, ane.

²Ba 'ỳr tẽn omũ nhym kawaru jakaja dja. Nhym me'ô 'ã nhỹ. Ô djudjê jamỳn o nhỹ. Nhym me kum bẽnjadjwỳr krădjê tu. Nhym kutun o nhỹ ne kam 'ã kawaru'ã tẽ. Kute me kunĩ 'ã amijo ăptâr ne me'ỳr prôt ne kute me par ne kute mekbê pyka pytarmã ne tẽ.

³Nhym kam Mrykĩ'ătomti abatành nyja ajte pi'ôk no'ôk 'ã oy djà nHITEPĂ ja'ã kuta. Nhym kam mỳjja tĩn ja jatârĩa imã kabẽn ba kuma. Nhym imã,

—Amrê tẽ, ane.

⁴Ba 'ỳr tẽn omũ nhym kawaru 'ô ajte dja. Kawaru kamrêk. Nhym me'ô 'ã nhỹ. Pyka kunĩkôt me kute abenwỳr prôt ne aben par kadjy. Kadjy ne me'ôja kawaru'ã nhỹ. Nhym me arỳm kum kàxdjwa kajgo ngã, kàxdjwa kajgo jabatành, rytĩre ne me kadjy kum kungã.

⁵Nhym kam Mrykĩ'ătomti jabatành nyja ajte pi'ôk no'ôk'ã oy djà nHITEPĂ ja'ã kuta. Nhym kam mỳjja tĩnja jatârijadjwỳ imã kabẽn ba kuma. Nhym imã,

—Amrê tẽ, ane.

Ba 'ỳr tẽn omũ nhym kawaru tykja ajte dja. Nhym me'ôja 'ã nhỹ. Mỳjja pytĩ'ã akre djà mỳn o nhỹ. ⁶Nhym mỳjja tĩn amãnhkrut ne amãnhkrutja kurũm me'ô kabẽn ba kuma. Nãm,

—Ê, arỳm ne mekbê djwỳ kêt. Prămkam ne me ar ba. Ota djwỳbê trigu'ã akre pydji pãnh raxi. Pãnh me ăpênh rã'ã nhym akamăt. Ne kam ajte djwỳ 'ôbê xebada'ã akre amãnhkrut ne ikjêkêt adjwỳnhdjwỳ pãnh rax. Pãnh me ăpênh rã'ã nhym akamăt. Djwỳ kêtka, djwỳ kairekam. Nhym bep pidjôbê uba kangômê mỳjja kute röny kangô pyrăk ja dja o bikênh kêt. Tãm dja kumex. O ne me ajne kêt. Kwărik wănh tãm măn o bikênh kêt, ane. Nãm ă me'ô kabẽn ane.

⁷Nhym kam Mrykĩ'ătomti jabatành nyja ajte pi'ôk no'ôk'ã oy djà nHITEPĂ ja'ã kuta. Nhym kam mỳjja tĩn amãnhkrut ne amãnhkrut kute o ino rerja imã kabẽn ba kuma. Nhym imã,

—Amrê tẽ, ane.

⁸Ba 'ỳr tẽn omũ nhym kawaru rărârja ajte dja. Nhym me'ôja 'ã nhỹ. Me'ô nhidjibê ne Tykre. Me tyk'ã amijakre. Nhym mỳjja kute katẽn tẽmja. Me tyk nhô pykamã me mrãnh kadjy ja ta ne kute katẽn tẽmja. Ar kute pyka kunĩkôt me kwỳ rax ne me parmã. Me kute abenwỳr prôt ne aben par nhym djwỳ kêtka prăm kute me par nhym me kanêdjwỳ kute me par nhym pykakam mry djăkrêdjwỳ kute me par kadjy. Kadjy ne ar tẽ. Kam dja me kwỳ rax ne ty.

⁹Nhym kam Mrykĩ'ătomti jabatành nyja ajte pi'ôk no'ôk'ã oy djà nHITEPĂ ja'ã kuta. Nhym kam kıkre kudjỳ djà bôr djà krakri me karô kumex. Mỳj me karô? Bir, me kute memã Metĩndjwỳnh kabẽn jarẽnho ba nhym kam me kute me par, me tãm karô ne kumex. Nãm me tĩn prăm kêt mex ne tu mekmã Metĩndjwỳnh kabẽn jarê nhym kam me me kupa. Me tãm karô ne kumex ba omũ. ¹⁰Nhym me kăj bê kabẽn ne kum,

—Bẽnjadjwỳr Pymati, gajbit amexo apyma ne katăt aje mekmã kabẽn jarênh djwỳnh, mã dja mytyrwỳ kute ga me ijo angryk ne pykakam me

jao ajkê, me kute me ipar pãnh meo ajkê? ane. Nãm ã kikkre kudjy djà bôr djà krakri me karô ã kum kabên ane. ¹¹Nhym kam me'ô mekmã kubêkà jaka ngã ne memã kum,

—Ê, me arek atyk djà kêto akrĩ ngrire. Atyk djà kêt ngrire gê me me anhôbikwa paro tẽn inomã kumê. Me akôt me Metĩndjwýnhmã àpênh, me akamy paro tẽn inomã kumê, ane. Nãm ã me'ô me karômã ane.

¹²Nhym kam Mrykĩ'átomti jabatàn nyja ajte pi'ók no'ók'ã oy djà nhitepã ja'ã kuta ba omũ. Nhym kam pyka kunĩ amingrêk ne. Amingrêk tỳ:x ne. Nhym kam mytjadjwý kakrãtyk ne wajêt. Nãm kute kubêkà pytĩ, kakrãtyk pyrãk. Nhym mytyrwýjadjwý no tĩn, no kamrêk tỳx ne. Kute kamrô pyrãk. ¹³Nhym kanhêtire jadjwý kãjkwa kurũm rôrôk ne. Pykakam rôrôk ne. Kute kôk djâbêr tỳx kute pidjô ngrãngrã ka'urja pyrãk. Nãm ã kanhêtire rôrôk ane. ¹⁴Nhym kam kãjkwa ajmã nẽn nhĩ'ãm tẽn akuno. Nãm tu amijarôx ne kute me kute kupip jarôx pyrãk, nhym kam krãnh kunĩ amũ ajkamên krĩ. Nhym apêxtidjwý kunĩ amũ ajkamên ikwã. Nãm krãnh amũ krĩ djãmã kre rũnh ne krĩ. Nhym apêxtidjwý ikwã djãmã kre rũnh ne ikwã.

¹⁵Nhym kam apýnh me ba djari kam bẽnjadjwýr rũnhmê me kute meo ba djwýnhmê me krãkamngôn nhô bẽnjadjwýrmê me ô nêkrêx kumexjamê me àprãrmê me kunĩ, me kute me pa 'amýnh nhym memã àpênh kajgo ar bajamê me kute memã o pãnh kadjy àpênhjamê me kunĩ ne me amijo apdju. Me tĩn prãme amijo apdju. Nãm me kênkrekam amijo apdjun krãnhkam kên krakri amijo apdju. ¹⁶Ne kam krãnhremã kabên ne kênãm kabên ne kum,

—On me inhily arôrôk ne me ijo apdju, me ipro. Krĩ djàtikam ýrjabê me ijo apdju ba me nokre pumũnh kêt. Mrykĩ'átomti jabatàn nyjamê ar ngrykbê me ijo apdju. ¹⁷Arým ne ar ngryk nhô akati me iwýr bôx. Mrãmri ne ar ngrykkumrêx. Mýj me'ô ne arkum ãmmã? ane. Nãm ã me kabên ane.

Ar kute mebê 144.000 kuka'ã idji janhôr.

7 ¹Nhym kam ijukri kadjy mrãnh djwýnh amãnhkrut ne amãnhkrut ne ku'ê ba omũ. Nãm ar apýnh ku'ê djakam ku'ê. Nhym ja kãjkwa krax 'ãnh dja nhym ja kãjkwa nhôt 'ãnh dja nhym ar ja aktã kãjkwa nhirê'ãnh dja ba omũ. Mýj kadjy ne ar ku'ê? Apýnh ar ku'ê djari kute kôkbê àptãrmã. Pykakam àbêr kêt ne ngô raxbê pyka kêt kam àbêr kêt ne bàkam àbêr kêt kadjy. Kadjy ne ar ku'ê.

²Nhym kam kadjy mrãnh djwýnh 'ô tẽ ba omũ. Kãjkwa krax kurũm ne kato ba omũ. Nãm ikrakam ràxo pi'ók no'ók djà byn o tẽ. O kute Metĩndjwýnh nhô àpênh'ã idji janhôr kadjy, Metĩndjwýnh tĩnja nhô àpênh'ã idji janhôr kadjy. Nãm kubyn o tẽn kam kàj bê arkum kabên. Metĩndjwýnh kadjy mrãnh djwýnh amãnhkrut ne amãnhkrutjamã kabên. Ar ja kute Metĩndjwýnh kabênkôt pykamê ngô raxbê pyka kêto bikênhmã. Ar kumã ne kàj bê kabên ne arkum,

3—Adjym, bar Metĩndjwỳnh nhõ àpênh'ã idji janhômã, bar me banhõ Metĩndjwỳnh nhõ àpênh'ã idji janhõ gar kam pykamẽ ngõ raxmẽ bào ajkẽ. Me kuka'a dja bar me idji janhõ, Metĩndjwỳnh nhõ àpênh tamirĩt gar aje meo abikênh kêt kadjy. Gar kam arym pykao ajkẽ, ane. Nãm ã kadjy mrãnh djwỳnh arkum ane.

4Nhym ar me kwỳ krãptĩ kuka'ã idji janhõ ba omũ. Me krãptĩ kubẽ 144.000 ne ar kuka'ã idji janhõ. Nãm mekbẽ idjaer apỳnh idji djàri me kwỳ'ã idji janhõ ba omũ.

5-8Mekbẽ Djudakam me kwỳ kubẽ 12.000.

Ne mekbẽ Rubênkam me kwỳ kubẽ 12.000.

Ne mekbẽ Gadjikam me kwỳ kubẽ 12.000.

Ne mekbẽ Axerkam me kwỳ kubẽ 12.000.

Ne mekbẽ Naptarkam me kwỳ kubẽ 12.000.

Ne mekbẽ Manaxekam me kwỳ kubẽ 12.000.

Ne mekbẽ Ximiãokam me kwỳ kubẽ 12.000.

Ne mekbẽ Rewikam me kwỳ kubẽ 12.000.

Ne mekbẽ Ixakakam me kwỳ kubẽ 12.000.

Ne mekbẽ Djeburõkam me kwỳ kubẽ 12.000.

Ne mekbẽ Jõdjekam me kwỳ kubẽ 12.000.

Ne mekbẽ Bẽnjamĩnkam me kwỳ kubẽ 12.000.

Be, nãm me abenã rõrõkkam 'ã akre kubẽ 144.000.

Me krãptĩ: kubẽkà jaka jangij.

9-10Nhym kam ijukri, be, me krãptĩ: ne me kumex ba me omũ. Axwe me krãptĩ. Nãm me te kute me'ã akremã. Djãm me krãre got. Nãm me kute pi'õ pyrãk ne kumex. Mỳj xẽ ne kumex? Bir, apỳnh mebêngõkre ba djàri, apỳnh amyngràri me ba djàri, apỳnh me õ pyka djàri, apỳnh me kabẽn djàri kunikõt ne me kwỳ Metĩndjwỳnhõ aminhõn krĩ djàti kabem abenã rõrõk ne kumex ne Mrykĩ'ãtomti jabatàn ny kabem kumex. Nãm me kubẽkà jaka jangij ne o kumex ne bõ byn o kumex ne kam kàj bê kabẽn ne,

—Be, mrãmri ne me banhõ Metĩndjwỳnh, ajbit kubẽ me bapytår djwỳnh. Tãm, krĩ djàtikam krĩa, tãm.

Ne Mrykĩ'ãtomti jabatàn nyja, tãm. Ar kubẽ ne me bapytår djwỳnh.

Ar tãm ne ar ja, ane.

Nãm ã me krãptĩ kabẽn ane. 11Nhym kadjy mrãnh djwỳnh kunĩ krĩ djàtimã ipõk ne kumex. Krĩ djàtimẽ mebêngëttemẽ mỳjja tĩn amãnhkrut ne amãnhkrutjamẽ ne kadjy mrãnh djwỳnh arkum ipõk ne tu mỳrbẽ rõrõk ne kumex. Ne kam Metĩndjwỳnhmã rax jarẽ ne kum,

12 —Mrãmri. Kõt ne me ane. Gajbit ne ga mekmã amexo amiptà ba me abenmã amex jarẽnho iba ne abenmã araxo amirĩt ne ano mex jarẽn kam amã amikĩnh jarẽn abenmã araxmẽ apyma jarẽn abenmã abẽnjadjwỳr rax jarẽn abenmã mỳjja 'õ abẽ bipdjur kêtumrẽx jarẽ. Gora gẽ me kunĩ amã ja jarẽn rã'ã rã'ã. Mrãmri. Godja ã ane.

Năm ã kadjy mrãnh djwỳnh ane, pijàm djàje tu mỳrbê rôrôk ne ã kabên ane. ¹³Nhym kam arkubêngê'tô imã,

—Mỳj xê ne kute kubêkà jaka jangjênh ne o kumexja? Mỳj xê nã? Mỳj kurũm ne me mỗ? ane.

¹⁴Ba kam kum,

—Gê't kon, kubêngê't. Gajbit aje mar, ane.

Nhym kam imã,

—Me ja ne me prĩne meo ajkê. Năm me prĩne me jao ajkê, meo bikênh rax ne. Nhym me ja katon kam nĩnh mỗn bôx. Arỳm ne me ô kubêkà pỗ nhym kam aka ne. Mỳjo ne me kupỗ nhym aka? Bir, Mrykĩ'átomtĩ jabatành ny kamrôo ne me kupỗ nhym aka, ane.

Metĩndjwỳnh kute memã axweo bingrành'ã ne kubêkà pỗnh nhym aka jakre.

¹⁵—Kam ne me Metĩndjwỳnh krĩ djàti kabem kumex ne kam kum apê. Akatikam kum apê ne akamàtkam kum apê. Metĩndjwỳnh nhũrkwàtikam ne me kum apê nhym bep krĩ djàtikam ỳrja dja umao me utàn ar meo ba. Ar me utàr mex ne meo ba.

¹⁶Kam dja me kum prãm kêt-kumrêx ne kum kôr kêt-kumrêx, nhym arngrodjwỳ dja me bĩn kêt-kumrêx, nàr kon atemã mỳjja kangro 'ôdjwỳ me bĩn kêt-kumrêx. Mỳkam?

¹⁷Bir, Mrykĩ'átomtĩ jabatành ny krĩ djàti nhĩpôkrĩ ỳrja, tãm dja ar me utàn meo ba. Kute mrãmri ne mrykĩ'átomtĩ ba djwỳnh kute ô mryô ba ja pyràk. Ne ngô kute meo tĩn kator djà'ỳr dja meo mỗ.

Nhym Metĩndjwỳnh ta dja me kunĩ no kangô ku'ôn memã no kangôo apêx nhym kam me mỳr kêt-kumrêx, ane.

Năm ã arkubêngê'tte 'ô imã kabên mex jarênhô ane.

Kute o y djà kute o ino rer'ã 'yr.

8 ¹Nhym kam Mrykĩ'átomtĩ jabatành ny ajte pi'ôk no'ôk'ã oy djà kute o ino rer'ã kuta nhym kam kàjkwakam mỳjja kunĩ anhikrê ne, nhym myt kwỳr ngrĩre. ²Nhym kam kadjy mrãnh djwỳnh kubê 7, Metĩndjwỳnh kabem ku'ê djwỳnh, ar ja ne ar ku'ê ba ar omũ. Nhym kam Metĩndjwỳnh arkum poti ngã. Poti kubê 7 ne apỳnh arkum kungã nhym ar amỳ.

³⁻⁴Nhym kam kadjy mrãnh djwỳnh 'ô kên karỳro ngônĩ ngrĩre byn o tẽn o dja, kikre kudjỳ djà bôr djà'ỳr ne o tẽn o dja. Nhym kam me'ô kikre kudjỳ djà kwỳ rax ne kum kungã. Kute me kabênmê kikre kudjỳ djào bikàrmã ne kum kungã. Metĩndjwỳnh nhô me mexja kunĩ kute kum amijarênhmê kikre kudjỳ djà bikàr ne xê't ne Metĩndjwỳnh'ỳr bôx kadjy. Krĩ djàti kabem ne kikre kudjỳ djà bôr djà dja. Kên karỳro ne adjênh ne dja. Kam ne kadjy mrãnh djwỳnh kikre kudjỳ djãmã adjà nhym xêr nhym kam kudjỳmê me kabên ro'ã Metĩndjwỳnh'ỳr bôx. Kũmmê ô me ja kabênmê Metĩndjwỳnh'ỳr wabin 'ỳr bôx.

⁵Nhym kam kadjy mrãnh djwỳnh kikre kudjỳ djà kadjy ngônĩ byn kam kam kuwy mẽ. Kikre kudjỳ djà bôr djàkam kuwy byn kam kikre kudjỳ

djà kadjy ngônham kumên kam
pykakam kumê, o pyka kôpênât ne.
O pyka kôpênât nhym kam arỳm
na krar ne rārāk ne adjênh nhym
pykadjwỳ amingrêk ne, tertet ne.



(Mỳjja apôx 8.6)

Potibê 7'ã ujarênh.

⁶Nhym kam kadjy mrãnh djwỳnh
kubê 7ja kute apỳnh ò poti kubê 7 kakôrmã.

⁷Nhym kam kadjy mrãnh djwỳnh kutewa poti kakô. Nhym kam
namê'ymê kuwy rôrôk ne. Kamrômê akân rôrôk ne. Tu tỳmkumrêx ne.
Nhym kam pyka kwỳ ra:x ne prïne xêr. Pykamê bà nokà 'ỳr 'ãnh ne xêt o
ino re. Nhym bep bô kunĩ ne prïne xêr. Nhỹnh ne bôre 'ô xêt kêt.

⁸Nhym kam atãri kadjy mrãnh djwỳnhja ò poti kakô nhym kam atãri
mỳjja kute krãnhre jabatãnh pyrāk ne pôr ne môn nox ne, ngô kôpênât
ne. ⁹Ngô raxbê pyka kêtka nox nhym kam ngô kwỳ ra:x ne kamrô, ngô
nhikjêbit ne kamrô nhym ngôkam mỳjja ar baja arỳm kwỳ rax ne ty,
ngô ipôkri 'ỳr ne tyk o ino re. Nhym kà rũnhjadwỳ amijo ajkên wangij,
kà kute katê 'ỳr ne ngjêxo ino re. Nhym kam mebêngôkre^b ar kàkam
bajadjwỳ arỳm kôt ty.

¹⁰Nhym kam atãri kadjy mrãnh djwỳnhja poti kakô. Poti kakô nhym
kam kanhêtidwỳ tỳm, kanhêtireti: ne tỳm. Pôkti: ne tỳm. Nãm kute me
kute bô 'ô ngrãmã angjênh nhym pôk rũnh ja pyrāk. Kàjkwa kurũm ne
môn tỳm. Ngô binhirênh kwỳkam rôrôk ne inore kwỳkamdjwỳ rôrôk ne.
Ngô nhino kunĩkam ne tỳm. Nhym ngô kwỳ rax ne mex rã'ã. ¹¹Kanhêtire
nhidjibê ne ỳ. Nhym kam idjikôt ngô nhikjê ne ỳkumrêx ne. Nhym kam
me kwỳ krăptĩn ty. Ngô djỳ ne me o ikôn arỳm tyko kumex.

¹²Nhym kam atãri kadjy mrãnh djwỳnhja ò poti kakô nhym kam
mytdjwỳ kwỳ rax ne ajmã nên kam akamât kô tyk ne, no nhikjêkambit
ne akamât kô tyk ne. Ne kam kàjbê pyka kurwỳ. Kurwỳ ngrire nhym
mytyrwỳmê kanhêtiredjwỳ kôt ã ane. Akatikam myt kàjbê irã nhym kam
akamât kô tyk ne. Nhym akamâtka djwỳ mytyrwỳmê kanhêtire kàjbê
irã nhym kam akamât kô ty:k ne.

¹³Ba kam omũho dja nhym kam àkkajkritti kỳjrũm ton mỗ. Kàjkwa tã
mỗ ba omũ. Nhym kàj bê memã kabên, ne,

—Watĩre, watĩre, watĩre. Pykakam me ar baja watĩre. Arỳm ne kadjy
mrãnh djwỳnh kute katê amãnhkrut ne ikjêkêt kute poti kakôr 'ỳr, ane.

9 ¹Nhym kam atãri kadjy mrãnh djwỳnh ò poti kakô nhym kam kàjkwa
kurũm kanhêtire tỳm. Pykamã tẽn tỳm nhym me kum kam o kajkep djà

^b 8.9 Apỳnh me ò pyka djàri kunĩkôt ne me kunĩ bêngôkre. Kubêkà jakamê me kakrătykmê
me babêngôkremê ne me kunĩ: bêngôkre.

ngã. Mÿjkam o kajkep djà nã? Bir, kre ry typydjikam o kajkep djà. Kre krâ'lyr kêt, kre o ino rer kêt, kre ry typydjikam o kajkep djà ne me kum kungã.

²Nhym kam kam o kajkep ne 'ã kuta nhym kurûm kuwy kûm katon mō. Kre ryti kurûm ne kuwy kûm kato. Kute kikatire kûm pyrâk nhym kam kûmja kâjkwamê mytmê prïne o akno nhym akamât kô tyk ne.

³Nhym kam kûmja kurûm krytkanhê bixadjwÿro kumex. Pykamã ne bixadjwÿro kumex. Ne kam àkrê. Àkrê:kumrêx ne. Kute me kamjÿrmã ne bixadjwÿro kumex. Kute mrâmri ne pykabê makre kute me kamjÿr nhym tokryja pyrâk. ⁴Nhym kadjy mrân timer djwÿnh krytkanhêmã kum,

—Kwârik wân timer pykakam bôreo abikên timer kêt, mÿjja nhingrôto abikên timer kêt, pïo abikên timer kêt. Me ajbit dja ga meo ajkê. Me kuka'ã idji kêtja, Metîndjwÿnh kute me kuka'ã idji kêtja, me tâmbit dja ga meo ajkê, ane.

⁵Nã, mrâmri ne krytkanhêja kute me kamjÿr ne kute me kamjêro ba kajgomã. Kute me par kêtê. Nãm me kamjuw nhym me tokry pymaje âmra ba'ã mytyrwÿ amân timer kute ne amân timer kute ne ikjêkêt. Nhym tokry: ne. Kute makre kute me kamjÿr nhym tokryja pyrâk. ⁶Nhym kam arÿm me te tyk prãme, krytkanhê kute me kamjÿr ar o bakam te tyk prãme, te amitykkam ama ne, ne tyk kêtumrêx ne.

⁷Mã ne krytkanhê kute? Djãm axwe uma? Nã, axwe uma. Nãm kute mrâmri ne me kute kawaru'ã aben par kadjy kute ngôn timer kubêkã kawarumã angjên timer nhym kam uma ja pyrâk. Nhym krytkanhê mÿjja kute me bën timer djwÿr krâdjê pyrâkja tu. Kên karÿro krâdjê ne kutu. Nãm krytkanhê no kre kute mebêngôkre nokre pyrâk. ⁸Nhym kîdjwÿ kute me nire kî pyrâk nhym wa kute rop djâkrêbê rijão djwa pyrâk. ⁹Nhym ôkôt kã kute tepkã pyrâk, ngôn timer ne ôngakkã. Ne ara rârãk tÿx ne. Kute mrâmri ne me kute abeno bakam kawarumê kãmran timer tÿx rârãkja pyrâk.

¹⁰Nhym tey kute makre tey pyrâk. O kute me kamjÿr ar o ba. Dja kute me kamjÿr ar o ba'ã mytyrwÿ amân timer kute ne amân timer kute ne ikjêkêt, nhym tokry: ne.

¹¹Krytkanhê nhô bën timer djwÿrbê ne kadjy mrân timer djwÿnh, kre ry typydjikam kadjy mrân timer djwÿnh. Idjibê ne O bikên timer djwÿnh, mekbê idjaer ne me ta kabên timer kum Abadô jarê, nhym mekbê kregu kabên timer kum Apôri jarê. Nhym bep me babêngôkre kabên timer kum ne O bikên timer djwÿnh.

¹²Be, watîre kutewa ne arÿm apêx. Àkkajkrittire kute memã “Watîre” jarên timer kutewa arÿm apêx. Nhym bep watîre amân timer kute ne me'ÿr bôx kêt rã'ã.

¹³Nhym kam atãri kadjy mrân timer djwÿnhja ô poti kakô nhym kam me'ô kabên ba kuma. Kikre kudjÿ djâ bôr djâ kurûm ne kabên. Kên karÿro kikre kudjÿ djâ bôr djâ Metîndjwÿnh kabem âmja, kurûm, anhô kurûm ne kabên kato ba kuma. ¹⁴Nhym kum, kadjy mrân timer djwÿnh kute poti kakôrmã kum,

—On arkum anhire, kadjy mrân timer djwÿnh amân timer kute ne o amân timer kute djuwprewã on arkum 'ãpre bô gê ar wãm tê. Ngô raxbê Jupraxikam me kute ar uwpre nhym ar ikwãwã, on arkum 'ãpre bô gê ar wãm tê, ane.

¹⁵Nhym kam arkum 'ãpre bô nhym kam ar mã mō. Ar kute me imexmã ne ar mō. Ar kute me kwÿ rax ne me imexmã. Ar kute me imexo têm ne me

kuto katê 'ÿr me paro krâ'yrmã. Kadjy ne me ar uwpre nhym ar ikwã. Ar ô akati ar'ÿr bôx nhym ar kute me imexmã katon mō. Arÿm ne ar ô amexmẽ ar ô mytyrwymẽ ar ô akatimẽ ar ô myt arÿm ar'ÿr bôx. ¹⁶Nhym ar ô krâkamngôn̄h kumex. Krâkamngôn̄h kawaru'ã krîja ne kume:x kute pi'ô pyrâk. Nãm 'ã akre kubê 200.000.000. Me'ô ne 'ã akren imã arê ba kuma.

¹⁷Be, Metîndjwÿnh ne imã ar ô krâkamngôn̄h jakre ba omû. Ba kawarumẽ krâkamngôn̄h pumû. Kawaru kumex nhym 'ã krâkamngôn̄h kumex. Tãm ne ba omû. Nhym krâkamngôn̄h aminhökôt nêje ngônho inôkã jangij ne o kumex. Ngônho inôkã kamrêkmẽ ngrãngrã kakrãtykmẽ ngrãngrã kute măn tu pyrâk. Nhym krâkamngôn̄h nhô kawaru ja ne krã rûnh'ã kabên. Krã kute rop djâkrêbê rijão krã pyrâk. Ne ajkwa kurûm kuwymẽ kûmmẽ kên ngrãngrã pôkmẽ apôxo kumex. ¹⁸Apôxo kumex ne kam me kupa. Be, kuwymẽ kûmmẽ kên ngrãngrã pôko ne me kwÿ rax ne me kubî. Me kuto katê 'ÿr ne me tyko ino re. ¹⁹Kawaruja ne âkrêkumrêx. Ajkwakôt ne âkrê, amymẽ kôt. Aktã âkrê djâkôt ne me kupa. Amy kute kangã pyrâk. Amy kubê kangã krâdjwÿ o me kamjã.

²⁰Nhym me'ã katãmja, mÿjja kute me imex kurãm me tînja, djã nãm me ja amim katon wãnh axwemã iren Metîndjwÿnh'ÿr amijo akêx got. Arkati, me ja ne me kute amim mÿjja punu nhipêxjamã irer prãm kêtumrêx. Nãm me mã ar me karô punumẽ mÿjjao metîndjwÿnh karô nhipêxmẽ arkum amijarênho ba, arkum rax jarênho ba. Be, nãm me kên karÿro, kryt jakao, ngôn̄h ngrãngrão, kêno, pio metîndjwÿnh karô nhipêx ar o ba nhym rît kêt ne umar kêt ne mrãnh kêt ne. Ja ne me kum amijarên̄h ar o ba, kum rax jarên̄h ar o ba. Me kute kum irer prãm kêtumrêx.

²¹Ne kam ajte me kute me parmẽ me udjymẽ me prô prãmmẽ me mjên prãmmẽ me âkînhimẽ, ja ne me kute kum irer prãm kêtumrêx. Me kute kum irer ne Metîndjwÿnh'ÿr amijo akêxmã kute mar kêtumrêx. Me axwebit ne me kum kînh. Nãm te Metîndjwÿnh kute mekmã uwêk màtmã.

Kadjy mrãnh djwÿnh kute pi'ôk byr ne ãm.

10 ¹Nhym kam kadjy mrãnh djwÿnh 'ô, tÿxkumrêx ne ruw. Kàjkwa kurûm ne tên ruw ba omû. Nãm kakrão prîne amikunon kam djwÿngwÿnh̄tire tu. Nokre kute myt pyrâk, ne te kute kuwy pôko krikam kãjmã pôk ku'ên pôk jabjê ja pyrâk.

²Ne kam pi'ôk no'ôk ngrire byn o dja. Pi'ôk no'ôk arÿm koxen kubyn o dja. Ne kam te djubôk ngô raxbê pyka kêt'ã djan te djuge atÿxã dja.

³Nãm te ajkij ne djan kam kãj bê kabên. Kãj bê kabên kute rop djâkrêbê rijão kâr tÿxja pyrâk. Kabên nhym kutã na krikrit ne. Nãm amipãnh kum kabên. Krikrit 'ã akre kubê 7.

⁴Na krikrit 'ã akre kubê 7 ne kabên, ba kam bit ije 'ã pi'ôk no'ôkmã nhym kãjkwa kurûm me'ô imã kabên ba kuma. Nãm imã,

—Kwãrîk wãnh. Tu udju. Na krikritkam kabên'ã akre kubê 7 dja ga tu udju. Kwãrîk wãnh 'ã pi'ôk no'ôk kêt, ane. Ba arÿm kuma.

⁵Nhym kam kadjy mrānh djwŷnh ije omũnh tũmja, ngô raxmẽ pykamẽ kam te bikjêr ne âmja, tãm ne kàjmã kàjkwamã ubôkja bẽn ⁶⁻⁷mekmã kabên pydjŷn arên memã kum,

—Mrāmri godja mÿjja amikrà kêtumrêx. Godja kadjy mrānh djwŷnh kute katẽ õ poti kakô nhym tebê mÿjja kato. Metĩndjwŷnh kute amrêbê õ àpênhmã, kabên jarênh djwŷnhmã arênhja dja on tebê kato, kute amitô kêtê. Poti kakôrmẽ ro'ã dja mÿjja bipdjur arÿm kato. Amrêbê Metĩndjwŷnh kute mekbê mÿjjao bipdjurja ne on kute memã o katormã, ane. Nãm ã kadjy mrānh djwŷnh mekmã ane. Metĩndjwŷnh ne kabênkumrêx. Kôt dja mÿjjao kato. Kam ne kadjy mrānh djwŷnh ubôko kàjmã Metĩndjwŷnh jakren 'ã mekmã ujarênh ku'ên mekmã kum,

—Metĩndjwŷnh ne tĩn o ino rer kêtumrêx. Tĩn, tĩn rã'ã rã'ã. Ta ne kàjkwa nhipêx ne kàjkwakam mÿjja ar baja nhipêx ne. Ne pykadjwÿ nhipêx ne pykakam mÿjja ar bajadjwÿ nhipêx ne. Ne ngô raxbê pyka kêtadjwÿ nhipêx ne ngôkam mÿjja ar bajadjwÿ nhipêx ne. Tãm dja amitô kêt ne on memã o kato, ane.

⁸Nhym kam kàjkwa kurũm kute imã kabên jarênh tũmja ajte imã kabên ne imã,

—Ajrã, on 'ÿr tẽn kute pi'ók koxen o ãmwã by. Kadjy mrānh djwŷnh ngô rax nhipôkri te nhikjê djãm ne atÿxã te nhikjê djãmwã ne kubyn o dja. 'ÿr tẽn kubê aby, ane.

⁹Ba kam 'ÿr tẽn 'ã ku'uw ne kum,

—Imã pi'ók no'ók ngrire ngã, ane.

Nhym kam imã,

—Mĩ, amim abyn krê. Gora kunĩ krê. Atik kadjwŷnhbê dja ÿ nhym bep ajajkwakam godja ànhkumrêx. Ành kute menh djãnh pyræk. Mĩ, ane.

¹⁰Ba kam ikra kurũm kubê kaba. Pi'ók no'ók ngrire ne ba kubyn kukrê. Nhym kam ijajkwakambit ànhkumrêx, ành kute menh djãnh pyræk. Nhym amũ itik kremã tÿm ne arÿm ÿ: ne. ¹¹Nhym kam imã,

—Be, dja ga ajte anhÿr djwŷnhràmm memã Metĩndjwŷnh kabên jarê. Kute apÿnh me õ pyka djãri, apÿnh me ba djãri, apÿnh me kabên djãri, apÿnh me bẽnadjwÿr djãri krãptĩkôt kute meo bikênhmã mekmã arê, ane. Nãm ã kadjy mrānh djwŷnh imã ane.

Metĩndjwŷnh nhõ àpên amãnhkrut ar ujarênh ba.

11 ¹Nhym kam me imã kô ngã, ije ũrkwãti'ã akre kadjy ne me imã kungã. Kute me àbêr djã pyræk. Nãm me imã kungã nhym kam Metĩndjwŷnh imã,

—Apa, on 'ÿr tẽn inhũrkwãti'ã akre, ane. Dja ga inhũrkwã'ã akren kam kikre kudjÿ djã bôr djã'ã akren kam me kute imã rax jarênh bajadjwÿ 'ã akre.

²Nhym bep inhũrkwãti kre kênhbit dja wãnh 'ã akre kêt ne. Mÿkam? Bir, arÿm ne me me bajtemmã kanga. Nhym kam me kute mekbê idjaer nhõ krĩ mexbê Djeruxarêo bikênhmã, õ krĩ mexo mexkumrêxbê Djeruxarê kute o bikênhmã. Kikre kunĩkôt dja me bajtem mrãn prĩne kikreo ajkên kikre

ngràn kam kôt inhûrkwāti kre kênhjao ajkê. Dja me kute o bikên'h'ã na tỳm amãnhkrut ne ikjêkêt ne kam ajte 'ã amex. Kam dja ba inhô àpênh jano.

³⁻⁴Ba ne ba inhô pyka djwỳnh ne kam inhô àpênh amãnhkrut kute pĩbê oriwêre amãnhkrut ikabem ku'êja pyrāk, ne kam ajte kute ngônhpôkti amãnhkrut ikabem ku'êja pyrāk, ar tãm dja ba ar ano, ar kute memã ikabêno amirĩtmã. Dja ar kubêkã kapĩre jadjàn kam ikabên'ã ujarênh ar ba. 'A ujarênh ar ba'ã akati krãptĩ, kubê 1.260. 'A na tỳm amãnhkrut ne ikjêkêt ne kam ajte 'ã amex. Godja ã ar ikabên'ã ujarênh ane, ane. Nãm ã Metĩndjwỳnh imã ane.

⁵Godja me'õ kute aro bikênhmã nhym kuwy pôk ar ajkwa krekrekôt katon me'õnh bĩ, prĩne ar kurê djwỳnhja 'õ ga. Be, godja me'õ aro kurê djwỳnh prãm nhym ar arỳm ã o bikênho ane, prĩne kuga. ⁶Nhym ar ta kabênkôt Metĩndjwỳnh kàjkwa'ã ijê nhym na rwỳk kêtumrêx. Ar Metĩndjwỳnh kabên'ã ujarênh bari godja na rwỳk kêtumrêx ne. Nhym kam ajte ar ta kabênkôt nhym ajte ngô kamrô. Nhym ar kabênkôt apỳnh mỳjja kute meo bikênh djàri apôx ne pykao ajkê. Apỳnh kute pykao bikênhmã mỳjja apôx tẽ, aben nhitepã mỳjja apôx tẽ.

⁷Nhym kam ar Metĩndjwỳnh kabêno amirĩto tẽ:n kam o amirĩt pa. O amirĩt pa nhym kam mrydjwaryre dja amim ar kurêtuw. Mrydjwaryre kre ry typydji kurũm katorja dja ar'ỳr prôt ne tỳxo ar akrenh mex ne kam ar kubĩ.

⁸Nhym kam ar tyn nõ. Kikre nhipôkri dja ar tyn nõ. Krĩrax jabatãnhkam kikre nhipôkri nõ. Mỳj krĩrax jabatãnh? Bir, kam ne me ar õ Bẽnjadjwỳr pĩte'lykam kunhõ tãm. Kumã ne me idjibê Xôtômamê Edjitu jarê. Nãm me axwekumrêx ne Xôtômakam me ja jaxwe'ã amijakren kam ajte Edjitukam me ja jamakkre kêt'ã amijakre nhym kam me krĩrax jamã idjibê Xôtômamê Edjitu jarê. Kam ne ar kute Metĩndjwỳnh kabêno amirĩt djwỳnh tyn nõ.

⁹Kam dja me kunĩ omũ. Apỳnh me õ pyka djàri, apỳnh mebêngôkre ba djàri, apỳnh amyngràri me ba djàri, apỳnh me kabên djàri kunĩkôt dja me ar omũho kumex. Ar tykja pumũho kumex'ã akati amãnhkrut ne ikjêkêt ne 'ã mêtjij. Nhym me abenmã,

—Kwãrĩk wãnh ar adjàr kêt. Axuk wãnh ar nõre, ane. ¹⁰Nhym kam pykakam me ar baja kĩnhkumrêx. Ar tyk ne nõrkam ar omũn kĩnhkumrêx ne kam toro kumex ne kam abenmã nêkrêx ngã. Mỳkam ne me ar tykkam kĩnhkumrêx? Bir, ar kute Metĩndjwỳnh kabên jarênh djwỳnh ja ne ar pykakam me ar baja prĩne ar meo bikênho ba. Kam ne me ar tykkam kĩnhkumrêx.

¹¹Nhym ar tyk ne nõr'ã akati amãnhkrut ne ikjêkêt ne 'ã mêtjij nhym kam Metĩndjwỳnh ar akô, ar tĩn kadjy ne ar akô nhym Metĩndjwỳnh djàkôr arkum wadjà nhym arỳm ar ajte tĩn ne ekruş ne kàjmã dja. Nhym kam me ar omũn kam kum ar uma: ne. Kum ar uma tỳxkumrêx ne.

¹²Nhym kam kàjkwa kurũm me'õ kabên. Kàj bẽ kabên ne arkum,

—Apa, on ar amrẽ tẽ, ane.

Nãm ã arkum ane nhym ar kuma. Kuman kam tu kàjmã tẽ. Mã tẽn wabi. Kakrãkam ne ar tẽ. Nhym ar kurê djwỳnh arek ar omũho kumex.

¹³Ar omũnho kumex katikôt nhym pyka tertet ne. Tu tertet tỳx nhym kam kikre kwỳ ajkaten rôrôk ne me kwỳ rax ne me imex ne. Me kwỳ rax'ă akre kubê 7.000 ne me imex ne. Nhym me tyk kêtja, pyka tertet kute me par kêtja, me tãm ne me tĩn prămkam Metĩndjwỳnhmă rax jarên kum tỳx jarê. Metĩndjwỳnh nhô kàjkwa djwỳnhmă ne me kum rax jarê.

¹⁴Be, watĩre nhitepă watĩre 'ô ne ja. Ota watĩre kute katê ră'ă. Arỳm me'ỳr bôx 'ỳr.

Kadjy mrănh djwỳnh kute katê kute ô poti kakôr.

¹⁵Nhym kam kadjy mrănh djwỳnh kute katê ô poti kakô nhym kam kàjkwakam me kabên. Kàj bê kabên ne. Jejumê Băm'ă ne me abenmă kum, —Bămbê me banhô Běnjadjwỳr ne krabê Kritu kute me bawỳr anor, ar tãm ne ar arỳm pyka kunĩkôt ar meo ba. Dja ar meo ba ră'ă ră'ă: ne, ane. Năm ă kàjkwakam me kabên ane.

¹⁶Nhym kam mebêngê kubê 24 tu mỳrbê rôrôk ne. Metĩndjwỳnh kabem běnjadjwỳr krĩ djăkam krĩja me tãm ne me tu mỳrbê rôrôk ne Metĩndjwỳnhmă rax jarên kum,

¹⁷—Běnjadjwỳr, Metĩndjwỳnh, atỳxo abê kumkati. Ga amrêbê: adjăkamă atĩn ne ar aban mă atĩn ră'ă.

Amă ne ba me amikĩnh jarê. Arỳm ne ga apymao amijo amirĩt mex ne aje ar meo abamo kraxmă.

¹⁸Apỳnh me ba djări ne me ngryk ar ba, ga gadjwỳ arỳm angryk kato.

Arỳm me tyk ne pykakam ikwăja nhô akati me'ỳr bôx. Arỳm aje me tyk ne pykakam ikwăjao akator ne kam aje memă pănň jarēnhmă.

Nhym anhô àpēnhdjwỳ arỳm ô akati me'ỳr bôx. Anhô àpēnhmê akabên jarēnh djwỳnhmê anhô me mextire jamê me kum apymaja kunĩmê me kătammê me rűnhmê. Arỳm me ja nhô akatidjwỳ me'ỳr bôx, ga aje memă o pănň nhym me kĩnhmă.

Nhym bep me axwe kute pykao bikēnh djwỳnhdjwỳ arỳm ô akati me'ỳr bôx. Ga aje me jao abikēnhmă, ane.

¹⁹Nhym kam kàjkwakam Metĩndjwỳnh nhűrkwăti amijă kuta. Amijă kuta nhym kam pĩo rara kēn karỳro krăkă dỳja, kam ne Metĩndjwỳnh kabên'ă kēn no'ôk nō, pĩo rara tãm ne amirĩt ne. Metĩndjwỳnh nhűrkwătikam ne amirĩt ne. Nhym kam na adjēnh ne rărăk ne krak nhym pykadjwỳ tertet ne. Nhym namê'y rôrô:ko kumex.

Me'ô niremê atemă mry kaăk'ă ujarēnh.

12 ¹Nhym kam mỳjja pumũnh kêt 'ô kàjkwakam kato. Mỳjja rax 'ô ne kato. Me'ô ni ne myt jadjan o dja. Ne mytyrwỳ'ă djan o dja. Ne kanhêtireo kră djên kutu. Kanhêtire kubê 12 ne o kră djên kutun o dja.

²Arỳm tujarô tỳx. Arỳm kra rwỳk 'ỳr ne kam kra àn tokry nhym amra.

³Nhym kam ajte mỳjja pumũnh kêt 'ôdjwỳ kàjkwakam ajte kato. Ē, atemã mry kaàk kamrêk ne kato. Ti:re ane. Krã kubê 7 ne kam kam bàri kubê 10. Ne krã kunĩkam me bẽnjadwỳr krã djê tu. ⁴Ne amyo kanhêtire kute katê 'ỳr ja kanhên bjêro mō. Kàjkwakam kanhêtire bjêro mōn pykakam kumê. Ne kam ni kabem kra kadjy dja. Mỳj kadjy? Bir, nija kra rwỳk ne kam amako dja. Ni kra rwỳk nhym on kute krên mã ne kam amako dja. Te kam ama.

⁵Nhym kam kra my ruw. Kute ar meo ban kabêno kute me anormã ne ruw. Apỹnh me ba djàri kunĩ dja ar meo ban kabêno me anon ar me axwemã bẽn tỳx ba. Djãm kute akràn mã ar me axweo bamã? Kati, dja kàxo àbêr djào ar meo ba. Tãm. Tãm ne arỳm ruw nhym arỳm Metĩndjwỳnh amim kumỳ. Tu amim mỳnhkumrêx ne amiwỳr o tẽ. Krĩ djàti'ỳr o tẽ.

⁶Nhym bep nãja ne katon prôt ne kapôt kukritmã kato. Nhym Metĩndjwỳnh arỳm kapôt kukritkam kutêp kum kikre. Kute o djuw mexmã ne arỳm kum kikre. Ne kam kam o djuw mex aro ba. Kute o djuw mex'ã akati kubê 1.260. Amex amãnhkrut ne ikjêkêt nhym ajte 'ã na tỳm nhym kam arek aro djuw mexo ba.

⁷Nhym kam kàjkwakam me abenwỳr prôt. Mĩgeumê kadjy mrãnh djwỳnhmê mry kaàkmê kadjy mrãnh djwỳnhmê ar abenwỳr prôt.

⁸Nhym bep kati, Mĩgeu ne ar tỳxkumrêx nhym te mry kaàkja kute ar parmã. Nhym bep Mĩgeu ne ar tỳxo mry kaàkja jakre ne kàjbê me kumê. Nhym kam kàjkwakam me ajte mrãnh kêtumrêx. ⁹Be, mry kaàk jabatànhtija ne me arỳm bôm kumê. Tãm, kangã tũmja kute me kàmex jarênh djwỳnh, idjibê Xatanaj, kute me kunĩ noo biknor djwỳnh, tãm. Tãm ne me bôm kumê, pykamã kumê, kadjy mrãnh djwỳnhmê ro'ã ne me bôm ar kumê.

¹⁰Nhym kam kàjkwakam me'ô kabên ba kuma. Kàj bê kabên ne, —Ota arỳm me banhō Metĩndjwỳnh me utà. Arỳm ne umao me utàr mex ne. Djãm me banhō Metĩndjwỳnh rerek got. Dja prĩne umao me utàn ar meo ba. Nhym Kritudjwỳ Metĩndjwỳnh kute amikôt arja dja kabênkôt ar meo ba.

Ga arỳm me kute bôm mênhja pumũ. Kute me bakamy kàmex jarênh djwỳnhja ne me arỳm bôm kumê. Nãm mã me banhō Metĩndjwỳnh jamakmã me'ã kabên ne te me banhō Metĩndjwỳnhbê me bakamy kurê. Nãm te kubê me bakamy kurê rã'ã nhym akamàt ne akati nhym ajte kubê kurê rã'ã nhym akamàt ne akati nhym ajte tãm rã'ã ne.

¹¹Nhym me bakamy tu kum ãm tỳx ne 'èxnhĩmã katon bôm kumê. Mỳj kanàrràm ne me bakamy kum ãm tỳx ne? Jeju ne mrykĩ'ãtomti jabatàn nh'y'ã amijakren ty ne kamrôo meo pãnh. Kanàrràm ne me tu kum ãm tỳx ne.

Xatanaj ne kute Jeju nhō me ja par nhym me kute umaje Jeju kangamã. Nãm te me kupa. Nhym me Metĩndjwỳnh kanàrràm tu ate krãn Jeju'ã ngrà rã'ãn kàj bê memã Jeju'ã ajarê. Me tĩn prãm kêtumrêx. Nãm me ã anen kam prĩne amim Xatanaj pyma ngrà ne kàjkwa kurũm bôm kumê.

¹² Ë, kàjkwa, on akĩnhkumrêx. Gê mebêngôkre^c akam ar bajadjwỳ akôt kĩnhkumrêx.

Nhym bep pykabê me ar bajamê ngô raxkam me ar bajamê ne arỳm me kaprĩ 'ỳr. Watĩre. Mỳkam?

Bir, Xatanaj, kute me kàmex jarênh djwỳnh, arỳm wãm me awỳr ruw. Arỳm ngry:k ne wãm me awỳr ruw. Arỳm ne tyk nhô akatio rãm ne jan arỳm amima. Arỳm amiman kam ngry:k ne, ane.

Nãm me ã kàjkwa kurũm kabên ane.

¹³ Nhym me arỳm bôm kumê nhym arỳm mry kaàkja pykakam bôx. Bôx ne kam ni'ỳr prôt ne. Kurũm kra my rwỳkja'ỳr prôt ne. ¹⁴ Nhym kam àkkajkritti jara ne nija pakam apôx. Xatanaj nhidji amãnhkrut ne ikjêkêt. Idjibê kangã ne idji 'ôdjwỳbê mry kaàkja. Nhym àkkajkritti jara nija pakam apôx, kangãbê tor ne kapôt kukritkam tẽm ne bôx nhym Metĩndjwỳnh kute o djuw mexmã. Kute o djuw mex 'ã amex amãnhkrut ne ikjêkêt ne kam ajte 'ã na pydji. Kadji ne pakam ara apôx.

¹⁵ Nhym mry kaàkbê kangãja kute nija bĩnmã aêro tẽn aby'ã ngô kapĩ. Ngô rax ne ajkwa krekre kurũm ajkapĩ. Kute 'ã ngô tãm nhym ngô kute mã o môr ne bĩnmã. ¹⁶ Nhym bep kati, pyka ne nio ôbikwan ngômã ajkij nhym kam ngô wadjàn ngrã. Mry kaàk jajkwa krekre kurũm ngôja wadjàn ngrã. ¹⁷⁻¹⁸ Nhym kam mry kaàk nijakam ngry:k ne kam ãm ajbir tẽn dja. Kute ni kra parmã ne dja. Mỳj ni kra nã? Bir, me kute Metĩndjwỳnh kabên mar ne kôt amijo baja, ne kute mekbê amipdjur kêt ne Jejukam pijàm kêt ne tu kute memã arênhja, me tãm ne mry kaàk kute me'ỳr prôt ne me parmã ajbir tẽn dja, ngô rax mỳrri dja, mekam amako dja.

Ngô rax kurũm mry'ô kator.

13 ¹ Nhym kam ngô rax kurũm mry 'ô kato ba omũ. Nãm bàri kubê 10 ne krã kubê 7. Ne apỳnh bàri djàri bẽnjadjwỳr krãdjê tu. Nhym kam krã kunĩ'ã idji arij ne idjio Metĩndjwỳnh djũn ne. ² Nhym mryja kute rop krori pyrãk nhym parja kute mrybê uxu par pyrãk, parkop jabjêti. Nhym bep ajkwa krekreja ne kute rop djàkrêbê rijão jajkwa krekre pyrãk. Nhym kam mry kaàk mryjamã kum,

—Ikabênkôt dja ga meo aban ipymao apyman inhỳr djàkam memã nhỹ, ane. Nãm ã kum ane. ³ Nhym mry krã 'ô ne tyn nôn kam ajte me aêrbê tĩn ne. Kute mrãmri ne me kute me par punukam me akubyn tĩnja pyrãk.

Nhym kam me kunĩ, pyka kunĩkôt ari ar aben pumũn kam mry kabênkôt ar ban mã kôt ajkamẽ. ⁴ Mry kaàk kute mrymã kum,

—Ga dja ga ipymao apyman inhỳr djàkam nhỹn idjô'ã meo aba, anhỹrja ne me mry kaàkmẽ arkum amijarênhô ba. Nãm me mrymã amijarên kum rax jarên kam abenmã kum,

^c 12.12 Apỳnh me ô pyka djàri kunĩkôt ne me kunĩ bẽngôkre.

—Mỳj me'ô ne mrymẽ ar kute raxo aben pyræk ne ar abenwỳr prôt nhym kutã kum ãmmã? Arkati, ane. Nãm ã me abenmã ane.

⁵Nhym kam mryja kabẽn punubit jarẽn ar o ba. Mry kaæk djô'ã ne mryja kabẽn punu ar ba. Nãm amijo rax ne ar Metĩndjwỳnh japrỳ o ba. Nãm ar meo ba, mry kaæk djô'ã meo ba'ã amex amãnhkrut ne ikjêkêt ne naja kuto katẽ. Ne kam mytyrwỳ 'ã akrebẽ 42. ⁶Nãm ar meo ban Metĩndjwỳnh japrỳ o ba. Nãm prĩne Metĩndjwỳnh djũn ne idji japrỳ ne kam ũrkwãbẽ kàjkwa djũn ne me kàjkwakam ar bajadjwỳ djũn ne. Djãm mry kabẽn mex got.

⁷Nhym kam mry kaæk mrymã kabẽn nhym kam kabẽnkôt Metĩndjwỳnh nhõ me ja'ỳr prôt ne. 'Ỳr prôt ne me kwỳ pan kàjbẽ me kumẽ. Ne kam kabẽnkôt, umakôt ar me kunĩo ba ne kabẽno me ano. Apỳnh mebẽngôkre ba djari, apỳnh amynggrari me ba djari, apỳnh me ô pyka djari, apỳnh me kabẽn djari kunĩkôt ne ar meo ba. Mry ne amijo aptàn Metĩndjwỳnh nhõ me jao ajkẽn kam me kunĩo ba. ⁸Nhym kam pykabẽ me ja kunĩ dja me mrymã amijarẽnho ba ne kum rax jarẽ.

Nhym bep me kwỳ, Jeju nhõ pi'ôk no'ôkkam me idji arija, me ajbit dja me kum mry kĩnh kêt ne kum rax jarẽn kêt ne. Jejubẽ Mryki'atomti jabatàn nyja ne ô pi'ôk no'ôk. Kute pyka nhipêx kêtĩ ne Metĩndjwỳnh arỳm amim me kute Jeju bĩn'ã karõ, me kute Jejuo mryki'atomtin kute bĩnmã amim 'ã karõ ne arỳm anhyr djwỳnhram kuma. Be, Jeju kubẽ Mryki'atomti jabatàn ny ja ne ô pi'ôk no'ôk, me tĩn rã'ã rã'ã'ã pi'ôk no'ôk. Nhym me tĩn rã'ã rã'ã kadjy pi'ôk no'ôkkam me idji arija me tãm dja me mrymã rax jarẽn kêt. Nhym bep me idji'ã no'ôk kêtja, me kunĩ dja me kum mry kĩnh ne kum rax jarẽn kum amijarẽn o ba.

⁹Gora me ajamak mex jabej on ama.

¹⁰Ê, dja me me kwỳo rôrôk ne meo mrãn mekbẽ ijẽ.

Ne kam tu me kwỳ pa, kàxdjwa kajgoo tu me kupa.

Nhỳnh me ja dja me meo rôrôk ne mekbẽ ijẽ ne kàxdjwa kajgoo me kwỳ pa?

Bir, Metĩndjwỳnh kute amim me'ã karõja, me tãm dja me mekbẽ ijẽ ne me kwỳ pa.

Kam dja Metĩndjwỳnh nhõ me ja kute tu amim Jeju markumrẽx ne mã 'ã ngrã tỳx ne 'ãno ãm ne kute kanga kêt mã.

Mry 'ôdjwỳ pyka kurũm kator.

¹¹Nhym kam mry 'ô kato, mry kute katẽ pyka kurũm kato, ba omũ. Nãm bàri amãnhkrut kute mryki'atomti jabatàn ny bàri pyræk. Ne kabẽn kute mry kaæk kabẽn pyræk. ¹²Ne kam mry kaæk jatãri mryja djô'ã umakôt ar meo ba. Ne kam me kunĩmã, pykabẽ me ja kunĩmã kum,

—On me mry kaæk jatãri mryjamã amijarẽn o aba ne kum rax jarẽ. Mry krã 'ô tyk ne nør ne kam ajte akubyn tĩnja on kum akabẽn ne kum rax jarẽ, ane. Ajrã, ane. Nãm ã mry kute katẽ mry kaæk jatãri mry ja'ã mekmã karõo ane.

¹³Ne kam mỳjja pumũnh kêt kwỳ nhipê:x ne. Kwỳ rax ne ipêx ne. Nãm me ipôkri kuwo ruw, kàjkwa kurũm pykamã kuwo ruw. ¹⁴Be, mỳjja pumũnh

kêto ne me noo akno. Nãm pykabê me kunĩ noo akno. Mry kaàk jatãri mryja kabênkôt ne mÿjja pumũnh kêt kwÿ nhipêx ne, tãri âmkaubit ne mÿjja pumũnh kêt kwÿ nhipêx ne. Ne kam mekmã kum, pyka kunĩkôt mekmã kum,

—On me mry kaàk jatãri mry ja karô nhipêx. Mry me kute te kàxdjwa kajgoo krã jayr nhym mã tĩn karô dja ga me ipêx, ane. Ajrã, ane. Nãm ã mry kute katê mekmã ane.

¹⁵Nhym kam me ipêx ne. Nhym mry kute katêja mry karô jakô, mry kaàk jatãri mryja karô jakô nhym arÿm tĩn ne arÿm akôn kabên ne. Nãm kabên ne memã me kwÿ'ã apnên mekmã kum,

—Tãmja kute imã amijarênh kêt ne kute imã rax jarênh prãm kêt. On dja ga me abĩ, ane. Nãm ã mry kaàk jatãri mryja karô mekmã ane nhym me kabênkôt arÿm me kwÿ pa.

¹⁶Nhym kam mry kute katêja ne me kunĩ'ã idji janhô. Nãm me ikra'ã idji janhôn me kuka'ã idji janhô, mry kaàk jatãri mryja nhô me ja kute amirĩt kadjy. Nhym me kwÿ te kubê amikati, kute me'ã idji janhôr pymaje te kubê amikati nhym tu me'ã idji janhô. Nhÿnh me ja'ã ne idji janhô? Bir, me kunĩ, me kàtømmê me bẽnjadjwÿrmê me ô nêkrêx krãptĩmê me ô nêkrêx kêtme me memã àpênh kajgo ar bajamê me kute memã o pãnh kadjy àpênhjamê. Me ja kunĩ'ã ne idji janhô. Nhÿnh ne me 'ô kukamê ikra'ã idji kêt ne. Me kunĩ.

¹⁷Dja me'ô'ã idji jêt prãm kêt nhym me arÿm kum mÿjja nhôr kêtumrêx, nhym ta kute mÿjja byr kêtumrêx, te kute amim mÿjja byrmã. Me'ã idjikôtbit ne me kute amim mÿjja byr. Mÿj idji nã? Bir, mry kaàk jatãri mryja ne me kwÿ'ã idjin kwÿ'ã numeru janhô.

¹⁸Be, me no mexbit godja me kuma. Ê, gora me ano mex jabej on mry'ã numeru pumũ. Numeru ja kute me idji pyrãk. Nãm 666. Be, mry'ã numeru ne ja.

Bàygogomê uba kadjy kàx byr.

14 ¹Nã bãm arek omũnhô dja nhym kam Mrykĩ'ãtomti jabatãnh nyja dja, ba omũ. Krãnhrebê Xijãokam ne dja. Nhym kam kôt me krãptĩ ku'ê. Me krãptĩ kubê 144.000, me tãm ne me kumex. Nhym Mrykĩ'ãtomti jabatãnh ny nhidjija me kuka'ã arij ne Bãm nhidjijadjwÿ me kuka'ã arij. Me tãm ne me Mrykĩ'ãtomti jabatãnh ny kôt kumex.

²Ba kam kàjkwakam me ngrer ma. Kute ngô rãrãkti pyrãk, kute na krak pyrãk. Nã, nãm me ngrer mexkumrêx. Nãm me kute pÿjãbàrekam me ngrer pyrãk ba maro dja.

³Nhym me krãptĩja ngrer ny jarê. Nãm krĩ djàtikam ÿrjamê mÿjja tĩn amãnhkrut ne amãnhkrutjamê mebêngêttêmê, me tãm ne me kabem ku'ên ngre. Ngrer ny ne me arê. Mÿj me ngrer nã? Me ajbit ngrer. Atemã. Me'ô kute arênh kêt. Amũ me'ô kute mar ne arênh kadjy kêt. Me ajbit ngrer, me krãptĩ kubê 144.000, Metĩndjwÿnh kute me utàr ne meo môrja, pyka kurũm meo môrja, me ajbit ngrer, me ajbit ne me kute mar ne arênh.

⁴Năm me mexo amiptàn kabôt katin ar ba. Năm me kute axwe 'ô mar kêtka mexkumrêx kute mrâmri ne me kute krô'ă meo prô kêtka mex ja pyrâk. Năm me ă axwemă irero ane. Năm me mă Mrykî'ătomti jabatânh ny kôt ajkamên mă kôt mō. Mrykî'ătomti jabatânh nyja abenbê meo ajkij ne meo mō. Kamrôo ne me utân meo mōn Metîndjwýnhmă me kungă. Me ja ne me kutewa nhym Bămmă meo mōn kum me kanga. Dja ĩ ajte me kwý rax ne kum me kungă. Bămmê ar ro'ă kute meo aminhôn kute ar meo bamă. ⁵Nhym me 'êxnhi kêtka mexrêx. Năm me axwe kêtka mextire ne ar ba. Ajmă kute kêt.

⁶Nhym kam kadjy mrânh djwýnh 'ô kă:jmă ton tē. Kăjkwa tă: tē. Mỳj kadjy ne ton tē? Bir, kute me kunimă kabên mex jarênhmă. Kute me kunĭ pykabê ar bajamă arênhmă, apýnh mebêngôkre ba djări, apýnh amyngărari me ba djări, apýnh me kabên djări, apýnh me ô pyka djări kunĭkôt ne kute mekmă arênhmă. Kabên mexja ne mex ră'ă ră'ă. Mekmă tûmrâm mex ne kam o ino rer kêtka mexrêx. ⁷Nhym kam kadjy mrânh djwýnhja ne kăj bê kabên ne memă kum,

—On me amă Metîndjwýnh pyman kum rax jarê, kute katât memă axweo pânĥ ne kute meo bikênhkam. Arým ne ô akati bôx. Arým kute memă axwe pânĥ jarênhmă. Dja memă axweo pânĥ. Djăm uma ngri got. On me kum rax jarê, kute kăjkwamê pykamê ngô raxbê pyka kêtme inoremê kute ipêx djwýnhmă rax jarê, ane.

⁸Nhym kam kadjy mrânh djwýnh 'ôdjwý kutewa kôt tēn memă kum, —Metîndjwýnh dja krĭraxbê Babirônĭkam me jao ajkê. Arým kute meo môr djă kaprărmă. Arým 'ÿr. Krĭraxbê Babirônĭj, krĭ jabatânh tām ne Metîndjwýnh arým kute o bikênhmă. Kute pyka mē meo bimirăkmă. Kam ne me axwekumrêx. Me axwebit ne me ar kam ba. Ne kam pyka kunĭkôt me axwemă me prêk ne. Nhym kam me ô'ă pyka kunĭkôt axwe. Ne kam kute me'ô kuprý, kurêti'ô kute amiwýr me 'wýr nhym me kute 'ă aben japanĥ ne kam kôt axwe, kôt kurêti ar ba pyrâk. Năm ă krĭraxbê Babirônĭj ă pyka kunĭkôt memă ane. Kute mrâmri ne me kute kadjwati kangô^d kôm ne bibânĥ ne axwebit kute mar ja pyrâk. Kam ne Metîndjwýnh mekam ngryk ne kute prĭne meo bikênhmă.

⁹⁻¹⁰Nhym kam kadjy mrânh djwýnh 'ôdjwý kadjy mrânh djwýnh ar kutewakôt tēn kăj bê memă arēn memă kum,

—Ê, me ikra'ă mry nhidjja ne me kuka'ă mry nhidjja kute mryo Metîndjwýnh ne mry karô Metîndjwýnh ne arkum amĭjarēnh o ban kum rax jarēnh o baja me tām gêdja Metîndjwýnh mekam ngryk ne prĭne meo ajkê. Djăm ngryk rerek got kăjbê meo ajkê. Dja prĭne meo bikēnh mex ne. Arým ne ngry:k ne. Mỳj me'ô gêdja kubê amĭjo apdju? Be djăm me kunĭo ajkê.

Be, dja Metîndjwýnh me ja, me kum mrymê mry karô kĭnhja kuwykam me kurê. Kuwymê kēn ngrăngră pôkkam me kurê nhym me kam ămnhirēnhô

^d 14.8 Mỳjja me kute o kôm ne kôt bibânĥ kunĭja, kadjwati kangômê uba kangômê, mỳjja kangô kunĭ ne me kum kadjwati kangô jarê.

kumex. Mrykĩ'átomti jabatành nymē kadjy mrānh djwýnh ar nokrekam dja me àmnhirēho kumex. ¹¹Nhym kuwy kũmja mã wabi, kute o ino rer kêtumrêx. Kuwy kute me kamjêrja kũm rã'ã rã'ã. Nhym me arek àmnhirēho kumex rã'ã: rã'ã. Djām me tyk djà kêt mã? Arkati. Djām akamátkam nār kon akatikam dja me tyk djà kêt? Arkati. Dja me arek àmnhirēho kumex. Be, dja ā Metĩndjwýnh meo bikēho ane. Me kute mrymē mry karômē o Metĩndjwýnh ne arkum amijarēnh o ba ne kute arkum rax jarēnh ar o ba ne 'ã idjija, me ja dja Metĩndjwýnh prĩne ā meo bikēho ane. Nām ā kadjy mrānh djwýnh kabēn ane.

¹²Kam godja Metĩndjwýnh nhō me ja, me kute Metĩndjwýnh kabēnkôt ar amijo baja, me kute tu amim Jeju markumrêxja, me ja dja me mã 'ã ngrà tỳx ne 'āno djan kanga kêtumrêx.

¹³Nhym kam kàjkwa kurũm me'ō imā kabēn ba kuma. Nām imā,
—On 'ã pi'òk no'òk. Ē, me kute Bēnjadjwýr 'āno ām nhym mete me par ja dja me kĩnhkumrêx. Bēnjadjwýr kadjy me tykja dja me arỳm kàjkwakam Jeju'ỳr bōx ne kam kĩnhkumrêx. Metĩndjwýnh kute memā kĩnh jadjār kadjy ne arỳm me ō akati me'ỳr bōx. Dja Metĩndjwýnh mã memā kĩnh jadjār rax ne, ane.

Nhym kam Metĩndjwýnh Karō imā,
—Nā, mrāmri. Mrāmri ne arỳm me àpēnh raxkam katyk. Me àbirkam dja me arỳm kàjkwakam tyk djà kêt ne. Nām me Jeju'ã ngrà tỳx ne mã kum apē. Nhym Metĩndjwýnh me omũn arỳm kute pānh memā kĩnh jadjār raxmā, ane. Nām ā Metĩndjwýnh Karō imā ane.

¹⁴Ja ne arỳm apēx ba kam ajte mỳjja 'ō pumũ. Nhym kakrā jaka ajte kato. Kato nhym kam kam me'ō nhỹ. Kute me'ō my pyrāk ne bēnjadjwýr krādję tun o nhỹ. Kēn karỹro krādję ne kutu. Ne kam kàx nhibōti ne kubyn o nhỹ. Wa mexkumrêx.

¹⁵Nhym kam kadjy mrānh djwýnh 'ō Metĩndjwýnh nhũrkwāti kurũm kato. Katon kum kàj bē kabēn, kakrākam ýrjamā kabēn ne kum,

—On aparmā anhō kàxwā o abēn o bàygogo jakàn o atom. Arỳm ne ō akati 'ỳr bōx. Arỳm ne ngrà tē. Arỳm ne pykabē me ja nhō akati me'ỳr bōx. Kute bàygogo ngrà nhym me kute o atom nhō akati pyrāk, ane.

¹⁶Nhym kam kabēnkôt pykamā kàxo abēn o akāro tēn kam o atom. Nām ā kakrākam ýrja me'ã bàygogo jakreo ane.

¹⁷Nhym kam kadjy mrānh djwýnh 'ōdjwý Metĩndjwýnh nhũrkwāti kurũm kato. Kàjkwakam Metĩndjwýnh nhũrkwāti kurũm kato. Ne adjwýnhdjwý ō kàx nhibōti. Wa mexkumrêx.

¹⁸Nhym kam ajte kadjy mrānh djwýnh 'ōdjwý, ō kuwy djwýnh kikre kudjý djà bōr djà kurũm kato. Katon kam kàj bē kum kabēn. Kadjy mrānh djwýnh kute kàxdjwa mex byr ne o āmjamā kabēn ne kum,

—On aparmā anhō kàxo abēn pidjōbē uba djō jakàn o atom. Arỳm ne tuk ne kumex. Nā, i'ík pytija pumũ. Arỳm ne pykabē me ja nhō akati me'ỳr bōx. Kute pidjō tuk nhym me kute o atom nhō akati pyrāk. Nām ā kum ane. Nām me axwe'ã pidjō tuk nhym me kute o atom nhō akati jakre. Metĩndjwýnh arỳm me axwekam ngryk ne prĩne kute meo bikēnhmā. 'Ā ne pidjō tuk jakre.

19-20 Nhyam kam kabênkôt tu pykamã kàxo abên o pidjô krô jakàro tên kam ôjao atom ne kam pidjô kangôo pôx djâkam kumex ne. Metîndjwýnh nhô djwýmê pidjô kangôo pôx djâ raxi. Kam ne kumex ne, kute kangôo pôxmã. Metîndjwýnh mekam ngryk ne prîne kute meo bikênh'ã ne djwý pynênh djâkam me kute pidjô kumex nhyam prîne kute anênh jakre. Atykmã ne pidjô kangôo pôx djâ dja.

Nhyam me kam kumex ne, nhyam kam prîne anê nhyam kam me kamrô prô:t ne. Pidjô kangôo pôx djâ kurûm me kamrô prôto nô. Djâm me kamrô ngri got. Axwe me kamrô rax ne prô:to nôn kam tàm ne. Kute ngô pyrâk ne kam ã ubým ane. Kawaru jajkwa krekrekam kàxirâx 'ãnh ne ubým itep ne. Me kamrô tàm mör ry'ã akre kubê 300 kiometu. Nhýnh me ja kamrô nã? Bir, me kum Metîndjwýnh kînh kêtja, me axweja. Dja ã Metîndjwýnh me axweo bikênho ane, me imexo ane.

Me kute apýnh meo bikênh djâri amýnh ne o ku'ê.

15 ¹Nhyam kam mỳjja pumûnh kêt 'ôdjwý kâjkwakam kato ba omû. Nãm ã tire ane ne ã uma ane. Kadjy mrân h djwýnh kubê 7 ne apýnh mỳjjao kute meo bikênh djâri amýn o ku'ê. Apýnh mỳjjao kute meo bikênh djâri ja godja Metîndjwýnh aben nhipetã meo bikênho tên kam 'ôo ino re. Ne arým ngryko ino re.

²Ba arek omûnhô dja nhyam mỳjja kute imôti pyrâk, kute ixéo imôti pyrâk kato ba omû. Ixemê kuwymê akã. Nhyam mýrri me ku'ê. Mýj me nã? Bir, me kum mrymê mry karô kînh kêt ne kute arkum mex jarên h kêt kumrêx nhyam te mry kute meo aminhôn me'ã idji janhôrmã, te me'ã idjimê numeru janhôrmã. Me ja ne me ixéo imôti mýrri kumex. Metîndjwýnh nhô pîjábãre ne me amýn o kumex. Me kam Metîndjwýnhmã ngrer kadjy. ³Môjdjê kubê Metîndjwýnh nhô âpênhamê Mrykí'átomti jabatân h nymê ar ngrer ne me arê.

—Bênjadjwýr, Metîndjwýnh, atýxo abê kumkati.

Mrãmri ne ga araxo mỳjja kunĩ nhípêx nhyam akôt rax ne uma ne.

Ga ne ga abê pyka kunĩkôt me kunĩ nhô Bênjadjwýr rax ne ar meo aba mextire ne ar meo aba.

Nã gãm memã akabên pýnh ne arê ne katât memã akabên jadjuw.

⁴Nã, Bênjadjwýr, nhýnh ne me'ô kum apyma kêt got.

Nhýnh ne me'ô amã amextire jarên h kêt got. Me kunĩ dja me kum apyman abenmã arax jarê.

Gajbit ne ga amexo apyma.

Nhyam kam pyka kunĩkôt me kunĩ dja me awýr ban bôx ne amã rax jarênho kumex.

Nã gãm prîne memã o pãnh, katât memã o pãnh.

Nhyam me kunĩ arým omûn kam amã rax jarê, ane.

Nãm ã me ngrer ane. ⁵Nhyam kam ijukri Metîndjwýnh nhûrkwãti amijã kutan dja. Kâjkwakam Metîndjwýnh nhûrkwãti amijã kutan dja ba omû. Nhyam

kadjwÿnhbê Metîndjwÿnh nhô kumoka'ê mextire jadjwÿ amijã kutan dja. ⁶Nhym kam Metîndjwÿnh nhûrkwãti kurûm kadjy mrãnh djwÿnh kubê 7ja apôx. Nãm apÿnh mÿjjao kute meo bikênh djãri kubê 7ja me kadjy amÿn o ku'ê. Kubêkã jaka, kubêkã jadjênh ne angij ne o ku'ê. Ne kên karÿro amirunh pren 'ã ku'ê.

⁷Nhym kam mÿjja tîn amãnhkrut ne amãnhkrut 'ô ne arkum ngôngh ngã. Kadjy mrãnh djwÿnh kubê 7jamã apÿnh kungã. Kên karÿro ngôngh kubê 7 ne arkum kungã. Ngônho ipu ne arkum kungã. Mÿj ne kam ipu? Bir, Metîndjwÿnh ngryk ne kam ipu. Metîndjwÿnh ta tîn ne ar ba rã'ã rã'ã ne kute o ino rer kêt, tãm ngryk ne ngônghkam ipu. Tãm ne arkum kungã.

⁸Nhym kam Metîndjwÿnh kûm prîne ûrkwãti kre jaê. Mÿj kûm nã? Bir, Metîndjwÿnh raxmê mexmê tÿxmê uma kam kûm. Tãm ne prîne ûrkwãti kre jaê. Nhym me te Metîndjwÿnh nhûrkwãtimã ngiênhmã. Nhym arÿm Metîndjwÿnh kûm mebê aptã. Nhym kadjy mrãnh djwÿnh kubê 7 ne apÿnh mÿjjao kute meo bikênh djãri kubê 7ja me'ã kapîno ku'ê, aben nhîtepã me'ã kapîno ku'ê. Nhym me'ã kapîn pa nhym me arÿm Metîndjwÿnh nhûrkwãtimã wangij.

Me kute ngônghbê 7kam Metîndjwÿnh ngryk me'ã kapî.

16 ¹Nhym kam Metîndjwÿnh nhûrkwãti kurûm me'ô kabên. Kãj bê kabên ne kadjy mrãnh djwÿnh kubê 7mã kum,

—On o tên pykakam kapî. Ngônghbê 7kam Metîndjwÿnh ngryk ipuwã on kapî, ane.

²Nhym kam kadjy mrãnh djwÿnh kutewa o tên pykakam kapî. Nhym kam kuwê me'ã apôx. Kuwê punure. Tokry:. Nhÿnh me ja'ã ne apôx? Bir, mry kute me'ã idji janhôr nhym me kute mry karômã rax jarênhja, me tãm ne kuwê me'ã apôx.

³Nhym kam atãri kadjy mrãnh djwÿnhja Metîndjwÿnh ngryk 'ôdjwÿ kapî. Ngô raxbê pyka kêtka ne kapî nhym arÿm ngô ta tu kamrô, kute me'ô tyk kamrô pyrãk. Nhym kam ngôkam mÿjja ar baja kunî ty. Tu tykkumrêx.

⁴Nhym kam atãri kadjy mrãnh djwÿnhja Metîndjwÿnh ngryk 'ôdjwÿ kapî. Ngô bixabjêrmê inorekam ne kapî. Nhym arÿm ngô ta tu kamrô.

⁵Nhym kam kadjy mrãnh djwÿnh kute ngô pumûnh djwÿnh kabên, ba kuma. Nãm Metîndjwÿnhmã kum,

—Be, mrãmri. Ga ne ga amexo apyma ne amrêbê: adjakamã atîn ne ar aban mã atîn rã'ã, mrãmri.

Nã gãm katât memã o pãnh ne, ane.

⁶Nãm me anhô me mexja nhimex ne, ne akabên jarênh djwÿnhjadjwÿ nhimex ne, ne me ja kamrô kapî:no kumex.

Ga arÿm meo angryk ne kam pãnh ngô kamrô memã angã, me kute o kômmã.

Mrãmri ne pãnh mexkumrêx, ane.

Nãm ã ngô pumûnh djwÿnh Metîndjwÿnhmã ane.

⁷Nhym kam kikre kudjÿ djã bôr djãdjwÿ kabên ne, ne kum,

—Nã, mrãmri, Bênjadjwÿr, Metîndjwÿnh atÿxo abê kumkati.

Ga ne ga akabên pydjín arên arým prîne katât memã o pãnh ne, ane. Nãm ã kikkre kudjý djà bôr djà kabên ane.

⁸Nhym kam atãri kadjy mrãnh djwýnhja Metĩndjwýnh ngryk 'ôdjwý kapĩ. Myt'ã ne kapĩ nhym kam myt pôr ne prîne me kuga. ⁹Arngro tỳxkumrêx ne prîne me kuga. Te me kuga nhym me mã Metĩndjwýnh japrý. Metĩndjwýnh kute apýnh mỳjja kute meo bikênhmã me'ýr anorja tãm ne me aprý. Mã aprý. Me kute amim kator kêt ne wãnh axwemã irer kêtumrêx. Kute kum mex jarênh kêtumrêx.

¹⁰Nhym kam atãri kadjy mrãnh djwýnh ja Metĩndjwýnh ngryk 'ôdjwý kapĩ. Mry krĩ djàkam kapĩ nhym arým ô me ja'ã akamât kô tyk ne. Akamât kô tyk prîne meo ajkamuw. Nhym kam me tokry djaje tu àmnhirênho kumex. ¹¹Àmnhirênhbê Metĩndjwýnh japrýo kumex. Kàjkwakam Metĩndjwýnh ne me ùn ne. Me tokry djaje, kuwêmê mỳjja tokry djaje ne me Metĩndjwýnh djũno kumex ne amim kator ne kute wãnh axwemã irern 'ýr amijo akêx kêtumrêx.

¹²Nhym kam atãri kadjy mrãnh djwýnhja Metĩndjwýnh ngryk 'ôdjwý kapĩ. Ngô raxbê Jupraxikam ne kapĩ nhym kam tu ngô ngrã, me kam tẽm kadjy. Kàjkwa krax kurũm me bẽnjadjwýr tẽm ne ngô'ã rêr, kadjy ne ngrã. ¹³Nhym kam karõ amãnhkrut ne ikjêkêt ne apôx ba omũ. Karõ punu kute bri ponhti pyrãk ne apôx ba omũ. Mry kaàk jajkwa krekremẽ mry jajkwa krekremẽ ar kabên jarênh djwýnh 'êxnhĩja jajkwa krekremẽ ar ja jajkwa krekre kurũm ne bri apôx, ba omũ.

¹⁴Ar karõ punu kute amijo brija ne Ar kubê Xatanaj nhô àpênh ne kam kute mỳjja pumũnh kêt kwý nhipêxmã. Ne kam mã me bẽnjadjwýr rũnh'ýr ba. Pyka kunikôt me bẽnjadjwýr rũnh kuni'ýr ban meo akprô. Me me'ýr prôt kadjy ne meo akprô. Metĩndjwýnh tỳxo kubê kumkati ngryk nhô akatikam, ô akati pymakam dja me me'ýr prôt ar ba.

¹⁵Me abenwýr prôt kadjy ne me abenwýr môn aben tẽpo mỗ nhym Jeju imã kabên ne. Ne imã,

—Ê, on me ikabên ma. Dja ba me aêrbê me'ýr bôx. Kute me àkĩnhĩ me aêrbê me ùrkwãmã ngjêx ne mekbê àkĩnh ba pyrãk. Dja ba ã me aêrbê me'ýr ibôx ane. Nhym bep me ôt kêt ne no tỳx ne kute ikam amako krĩja dja me kĩnhkumrêx. Me tãm dja me kute me mrãnhmã kute kubêkã jangjênh ne mrãnh djàkam amako krĩja pyrãk. Nhym bep me ate krãja dja me kute me ôt mýrri me ban bôx nhym me kute kubêkã jangjênh kêt ne pijàmkam mrãnh pyrãk. Dja me ã kute ikam amak kêtja pijàm ane, ibôxkam ã pijàm ane. Nãm ã Jeju Kritu memã amibôx djà jarênho ane.

¹⁶Nhym kam ar karõ punu kute amijo brija me bẽnjadjwýr rũnh akprô. Me kute me'ýr prôt kadjy ne meo akprô. Me kute abeno bikprôn timer djà nhidjibê Amadô. Mekbê idjaer kabênkam ne Amadô. Kam ne me bẽnjadjwýr rũnh abeno akprô.

¹⁷Nhym kam kadjy mrãnh djwýnh kute katê ne Metĩndjwýnh ngryko ino rer kapĩ. Kôk djàbêrkam ne kapĩ nhym kam Metĩndjwýnh krĩ djãti kurũm me'ô kabên. Metĩndjwýnh nhũrkwãtikam krĩ djãti kurũm ne kabên ne. Kàj bẽ kabên ne,

—Anũ, o ino rer ne arým ja, ane.



(Mÿjja apôx 16.21)

¹⁸Nhym kam na adjênhmê krakmê rārākmê. Nhym kam pykadjwÿ tertet tÿ:x ne. Nām amingrêk tÿx ne. Me bakrax kurūm me bakukāmāre aben nhipā bixadjwÿr tēm ja'ô kute pyka kute amingrêk ja'ô pumūnh kêtikumrêx. Nām tertet tÿ:x ne.^e

¹⁹Nhym kam krîrax jabatānhbê Babirônijkam pyka ajkij nhym kikre kunī rôrôk ne ajkaten amingrân kumex. Babirônijkam pyka amikokij ne arÿm amānhkrut ne ikjêkê ne ikwā. Nhym pyka kunīkôtdjwÿ krîrax rôrôko kumex nhym kikre prîne amikaten kumex. Be, mrāmri ne Metîndjwÿnh Babirônij jabatānhja mar ar o ban kam arÿm o ajkê, prîne kum axweo pānh ne. Nām tu mekam ngryk tÿx ne. Mÿj me'ô gêdja kubê amijo apdju? Be, dja me kunio ajkê, prîne meo ajkê. Djām Metîndjwÿnh me axwekam ngryk kêt got.

²⁰Nhym kam apêxti kunī nhî'ām mrān akuno. Nhym krānhdjwÿ kunī tu akuno.

²¹Nhym kam namê'y me'ā rôrôko kumex. Kājwa kurūm ne me'ā rôrôk ne. Axwe abatānh, axwe utī. Utīkam 'ā akre kute 40 kiru pyrāk. Djām kam

^e 16.18 Djām pyka kute amingrêk kêt Arkati. Pyka kute amingrêk.

got me axwe kangan kam Metĩndjwỳnhmã rax jarẽ? Arkati, nãm tu me Metĩndjwỳnh djũno kumex. Namê'y kute meo bikẽnhkam tu Metĩndjwỳnh djũno kumex. Djãm namê'y rôròk kajgo got? Kati, nãm meo bikẽnh rax ne.

Me'ò kuprỳ kurėti mry'ã ỳr.

17 ¹Nhym kam kadjy mrãnh djwỳnh kubê 7 kute ngõnhbê 7 jamỳnhja 'ò ne imã,

—Apa, amrẽ tẽ, ba amã mỳjja jakre ga omũ. Me'ò kuprỳ ne ja. Tãmja ne ngò kunĩ'ã krĩ, ane. Tãmja ne me kunĩ abenmã arẽ. Me kunĩ arỳm abenmã kurê jarẽ. Nhym Metĩndjwỳnh arỳm axwe man kute o bikẽnhmã. Krĩraxbê Babirõnij ne me'ò kuprỳ kurê'ã amijakre. Krĩrax jakam ne mỳjja punu ne kam kute me'ò kuprỳ kurėti pyræk.

²Nhym apỳnh pyka djàri me ò bẽnjadjwỳr rũnh 'ỳr bao ku'ê. 'Ã aben japa. Nhym pyka kunĩkòt me kunĩ 'ỳr ban kam kumex. Me'ò nija ta ne memã kadjwati kangô' ngã nhym me o ikõn ajbãn kam kurẽo kumex.

Nãm ã kadjy mrãnh djwỳnh imã ane. ³Ã imã anen kam mã ikarõo tẽ. Kapòt kukritmã ne ikarõo tẽn o bõx. Ba kam me'ò kuprỳ kurėtija pumũ. Nhym mry kamrêk'ã nhỹ. Nhym mryja'ã idjio tuknĩ. 'Ã idjijao ne prĩne Metĩndjwỳnh japrỳn ùn ne. Nhym mry krãbê 7 ne bàribê 10.

⁴Nhym me'ò kuprỳ kurėtija kubêkã kamrêkmẽ tyk jadjàn o nhỹ. Kunhêr krãptĩ. Kẽn karỳrmẽ kẽn mextemẽ angã krã kute ngàp jadjênh pyræk. O ne amikunhêr. Ne ngõnhkrã byn o nhỹ. Kẽn karỳro ngõnhkrãkam mỳjja kroo ipu ne kubyn o nhỹ. Mjên prãmmẽ kurẽmẽ ja ne kam o ipun 'ã kubyn o nhỹ. ⁵Ne kuka'ã idji. Mỳj idji nã? Bir, mỳjja bipdjur. Bir,

—Krĩrax jabatãnhbê Babirõnijkam ne me kuprỳ kurėti kator kutewa nhym kam me ô'ã pyka kunĩkòt punu ar ba, arĩk ar ba.

Nãm ã kuka'ã idji ane.

⁶Me'ò kuprỳ kurėtija tu ajbã. Kamrô ne o ikõn kam ajbã. Nãm prĩne Metĩndjwỳnh nhõ me mexja kwỳ nhimex ne, prĩne me kute tu amim Jeju markumrêx ne mã kòt bikamênh nhym me te kute me par nhym me mã kòt bikamênhja ne prĩne me imex ne me kamrô kapĩn o ikõn kam ajbã. Be, nija ne ba omũn kam kam ino tyn djan te ije omũnhmã ne kam,

—Tò mỳj nã? ane.

⁷Nhym kam kadjy mrãnh djwỳnh imã,

—Mỳkam ne ga kam ano tyn dja? ane. Ê, ba mỳjja bipdjurja amã arẽ ga ama. Ba amã nija jarẽ, krĩrax kute ni jaxweti'ã amijakreja amã arẽ ga ama, ne ajte mry kute turja jarẽ. Mry krãbê 7 ne bàribê 10, tãm dja ba amã arẽ, ga ama.

⁸Mry aje omũnhja ne amrêbê tĩn ne ar ba. Ne kam tu akuno. Dja ajte kato. Kre ry typydjikurũm ajte katon ar mrã. Ar mrãn kam tu biknorkumrêx ne.

/17.2 Mỳjja me kute o kôm ne kòt bibãnh kunĩja, kadjwati kangômẽ uba kangômẽ, mỳjja kangô kunĩ ne me kum kadjwati kangô jarẽ.

Nhym pykabê me ja te omûn kam abenkam no tyn kumex. Me kute Jeju mar kêtja dja me te kute mry marmân kam abenkam no tyn kumex ne abenmã,

—Mÿj mry got ja? Nãm tîn ne ar ban akunon kam ajte akubyn kato, anhÿro kumex.

Djã nãm Metîndjwÿnh me ja tîn rã'ã rã'ã'ã pi'ôk no'ôk got me kôt mry ma? Kati, pyka nhipêx kêtri kute me ja tîn rã'ã rã'ã'ã pi'ôk no'ôk kêt. Kam dja me mry mar kêt kumrêx ne. Kam ne me mry tîn ne biknor ne ajte akubyn katorja pumûn kam abenkam no tyn kumex.

⁹Ê, me no mexbit dja me kuma, me kute mÿjja marbit dja me kuma. Ê, mry krâbê 7 kubê mÿjja amãnhkrut. Krã kubê krãnhre ne krî. 'Ã ne nija krî. Adjwÿnhdjwÿ krâbê bënjadjwÿr rûnhbê 7. ¹⁰Bënjadjwÿrbê 5 ne arÿm kêt mexi. Nhym bep pydji ne tîn ne ar ba rã'ã, nhym bep ikjêja ne kator kêt rã'ã. Dja katon kam ar meo ba ngrire. ¹¹Be, mryja amrêbê tîn ne ar ban arÿm biknorja, tãm ne kubê bënjadjwÿr rax'ô, bënjadjwÿr rûnhbê 7 ja'ô, ne arkôt akuno.

¹²Nhym bep bàribê 10, aje omûnhja kubêdjwÿ bënjadjwÿr rûnhbê 10. Kraxje mete ar'ã bënjadjwÿr mênh nhym ar kute ar meo ba kêt. Adjÿm, tûmrãm, dja me ar'ã bënjadjwÿr mênh nhym ar meo ba. Mrymê ar aprakamã ar ar meo ba. Dja ar ro'ã ar meo ba ngrire.

¹³Be, bënjadjwÿr rûnhja godja ar abenkôt kabên ne tu mry kabênkôt ar meo ba. Nhym mryja pydji ne bënjadjwÿr raxo ar akren ar meo ba.

¹⁴Nhym kam bënjadjwÿr rûnhja dja Mrykî'átomti jabatãnh ny'ÿr prôt ne. Ar kunî dja ar'ÿr prôt ne.

Nhym bep Mrykî'átomti jabatãnh ny ta dja amijo aptàn pyka mên aro amrà. Djãm Mrykî'átomti jabatãnh ny bënjadjwÿr ngri got. Arkati. Bënjadjwÿr raxbê kumkatiti. Kute bënjadjwÿr raxo pykabê me bënjadjwÿrja kunî jakrenh mexi. Kam ne kubê Bënjadjwÿr raxbê kumkatiti. Kam dja ô me jamê prîne pyka mên ar bënjadjwÿrbê 10jao amrà. Ô me ja, Metîndjwÿnh kute amiwÿr me 'wÿr ne kute amijo me utãrja nhym me tu kute amim markumrêx ne mã kôt bikamênh ne kute kanga kêt, me tãm dja me Mrykî'átomti jabatãnh nykôt môn kurê djwÿnhjao ajkê.

Nãm ã kadjy mrãnh djwÿnh imã ane. ã imã 'ã ujarênh ane. ¹⁵Ne kam arek imã kabêno dja ne imã,

—Ê, apÿnh ngô ikwãja, 'ã me'ô kuprÿ kurêti krî ga aje omûnhwã, ngôja ne kute me uràk. Me'ã ne ngôja amijakre. Apÿnh me ô pyka djãri, apÿnh me ba djãri, apÿnh mebêngôkre ba djãri, apÿnh amyngràri me ba djãri, apÿnh me kabên djãri kunîkôt me ja'ã ne ngôja amijakre.

¹⁶Ne aje bàribê 10 pumûnhwãmê mry'ã ÿr ga aje omûnhwãmê ar tãm dja Ar kubê ni kuprÿ kurêti kînh no kati ne arkum kurêkumrêx ne kam o ajkê. O ajkên prîne kunhêrmê ô kubêkã mexja kubê kunî by nhym tu irãri nō. Nhym kam ar ï kwÿ krê, me'ô kuprÿ nhî kwÿ krên kam 'ã kâtãm kuwykam kumê nhym prîne xêr.

¹⁷Mrãmri dja ar ã o ane. Mÿkam? Bir, Metîndjwÿnh ne kadjy ar ngrêk ne, bënjadjwÿrbê 10ja ar ngrêk ne. Metîndjwÿnh ta ne arÿm amim 'ã karô ne

kam ar kadjwỳnhbê arkum arê. Nhyam kam kôt ar bẽnjadwỳrbê 10ja ôkre kadjwỳnhbê amim 'ă karôn o ajkê. Nâm ar axikôt kabên ne mrymă kum,

—Gajbit dja ga apydjin abẽnjadwỳr rax ne ar meo aba. Nhyam be nija gêdja wăm nō, ane. Nâm Metĩndjwỳnh anhỳr djwỳnhram tu kônĥ arkum irkumrêx nhyam kam ar kôt o tẽn o tẽn inomă kumê. Ar kute amimar kêt ne ar Metĩndjwỳnh kabênkôt tẽn.

¹⁸Nhyam krĩrax jabatànhbê Babirônij ne me'ô kuprỳ kurêti ga aje omũnh wă'ă amijakre. Krĩraxja ne pyka kunĩkôt me kadjy bẽnjadwỳr nhyam bẽnjadwỳr kunĩ 'ỳr ba:o ku'ê, 'ỳr ô nêkrêxo bao ku'ê, nhyam kam krĩraxbê Babirônij raxo bẽnjadwỳr ja jakre ne kam meo ba, ane. Tăm ne me arỳm o ajkê, ane. Be, nâm ă kadjy mrănĥ djwỳnh imă 'ă ujarênh anen imă arênh o tẽn inomă kumê.

Kute pyka mẽ Babirônijo bimrăk.

18 ¹Ba arek omũnh o dja nhyam kam kadjy mrănĥ djwỳnh 'ô kăjkwa kurũm tẽn ruw. Kute bẽnjadwỳr rax pyrăk ne adjênĥo prĩne pyka kurwỳ. ²Ne kam kăj bê kabên ne,

—Ê, arỳm ne kêt ne. Krĩraxbê Babirônij, krĩ jabatànhja ne Metĩndjwỳnh prĩne o ajkên pyka mẽ meo amră nhyam arỳm kêt ne. Arỳm ne Xatanaj nhô àpênĥ punu 'ỳr bôx ne kam kam ar ba. Nhyam kam apỳnh me karô punu djări kam ar ba. Nhyam apỳnh ăk punu djări kunĩdjwỳ me kum kurêja kam ar ba.

³Mrămri ne Metĩndjwỳnh arỳm prĩne pyka mẽ meo amră nhyam kam kam ar ba. Mỳkam?

Bir, axwe pănĥ. Babirônijkam ne me axwebit ar ba. Kam ne me axwe'ă bit abenmă karô.

Kute me'ô kuprỳ kurêti 'ô kute amijă memă àpnênĥ nhyam me tu 'ỳr ba ar ba nhyam kute memă kadjwati kangô^s nhôr nhyam me kute o kôm ne bibănĥ ne kurê ar ba pyrăk.

Nâm me ă pyka kunĩkôt kum krĩraxbê Babirônij kĩnh o ane. Pyka kunĩkôt ne me bẽnjadwỳr kunĩ kum kĩnh ne 'ỳr bao ku'ê kute me'ô kuprỳ kurêti'ă ne kute aben japanĥ pyrăk nhyam pyka kunĩkôt me kute nêkrêxo ba djwỳnh Babirônij'ỳr ô nêkrêxo bao ku'ê ne arỳm pănĥ ô pi'ôk kaprĩ rax ne.

Babirônij axwe kum nêkrêx prăm kute me'ô mjên prăm pyrăk nhyam me kute nêkrêxo ba djwỳnh kôt ô pi'ôk kaprĩ rũnhkumrêx ne.

Djăm Babirônij mex got. Axwe punu, ane.

Nâm ă kadjy mrănĥ djwỳnh kabên ane. ⁴Nhyam kam kăjkwa kurũm me'ôdjwỳ kabên ne memă kum,

—Apa, inhô me ja, on me me kurũm akato. Mekôt me ajaxwe ba ije mekôt me ajo ibikênĥ karô on me akato, ane.

§ 18.3 Mỳjja me kute o kôm ne kôt bibănĥ kunija, kadjwati kangômê uba kangômê, mỳjja kangô kunĩ ne me kum kadjwati kangô jarê.

⁵ Be, nām Babirônij aben nhitepã axwe tēn arỳm kàjkwa 'ỳr itep ne. Nhym Metĩndjwỳnh kute axweo biknor kêtikumrêx. Nām kuman o nhỹ, ane.

⁶ Gora me amipãnh. Krĩraxbê Babirônij kute me ajo bikēnh 'ānh dja ga me amipãnh o abikēnh itep ne, o aben pyrāk ne.

Kati, me amipãnh o abikēnh amānhkrut. Djām krĩraxbê Babirônij kute me ajo bikēnh ngri got. Axwe kute me ajo bikēnh raxi, kam dja ga me amipãnh o abikēnh amānhkrut ne.

Nām mỳjja djỳo me akōm ne. Kam dja ga me amipãnh mỳjja djỳo kōmo amānhkrut ne, ane.

Nām mỳjja djỳo kōm'ã kute meo bikēnh jakre,

—Kam dja ga me amipãnh mỳjja djỳo kōmo amānhkrut ne, ane.

⁷ Krĩraxbê Babirônij ajbit ne raxo amiptàn ò nêkrêx kumex. Kam dja ga me meo kaprĩmê me tokrymê o amipãnh, kute ò nêkrêx kumexja 'ānh o itep ne.

Nām krĩraxbê Babirônij ôkre kadjwỳnhbê amim,

“Ota ba arek ibēnjadjwỳrkumrêx ne nhỹ. Mỳkam dja ba ikaprĩ?

Djām imjên ibê tyk got ba ikaprĩ?

Djām ibixangri dja ba ibēn kêt mex ne nhỹ?

Kati, ibixangri kêt. Kam dja ba ikaprĩ kêtikumrêx”, ane.

Nām ã krĩraxbê Babirônij ni'ã amijakreo ane.

⁸ Nām ã amim ane ne kam nhỹ. Kam dja tēbê apỳnh mỳjjao kute meo bikēnh djàri 'ỳr bōx.

Myt tām kam dja o bikēnh djàja kunĩ abenã rōrōk ne arỳm 'ỳr bōx.

Gêdja tyk 'ỳr bōx ne bixangri 'ỳr bōx ne kum prām 'ỳr bōx.

Tēbê dja o bikēnh djà ja kunĩ 'ỳr bōx. Nhym kam me kuwykam kumê nhym xêr.

Bēnjadjwỳrbê Metĩndjwỳnh ne tỳxikumrêx ne kum axwe pānh jarê nhym arỳm 'ỳr bōx.

Nām ã kabēn ane.

⁹ Pyka kunĩkôt dja me bēnjadjwỳr àmrao kumex. Me bēnjadjwỳrja kum nija kĩnh ne 'ỳr bao ku'êkam kute me me'õ kuprỹ kurêti'ỳr me bao ku'ê ja pyrāk. Kam dja me abej àmrao kumex. Me kute kukwakam amim nêkrêxo àptār o bakam. Dja krĩrax pōr ne kũm ty:k ne. Nhym me bēnjadjwỳr abej àmra:o kumex, ¹⁰ omũho kumex. Krĩrax kaprĩmê tokry pymaje ne me nĩjar djan omũho kumex ne kam abenmã kum,

—Watĩre, Babirônij. Krĩrax jabatānh, krĩrax pyma, watĩre.

Nām tebê Metĩndjwỳnh prĩne ajo ajkê ga nō, ane.

¹¹ Nhym me pyka kunĩkôt kute nêkrêxo ba djwỳnhjadjwỳ àmrao kumex ne kaprĩ:re. Nhym tu wānh nêkrêx nō. Mỳj me'õ godja me kute nêkrêxo ba djwỳnhbê nêkrêx byn pānh pi'ók kaprĩ ngā? Arkati. Babirônij ne ipêxri me kute nêkrêxo ba djwỳnh kute kum nêkrêx rero bajamã o pānh ne.

Nhym arỳm xêr nhym kam ¹² me'õ kute mekbê apỳnh me kunhêr djàri byr kêtikumrêx, me ò kēn karỳrmê kryt jakamê kēn jadjēnhmê angà krã kute

ngàp jadjênh pyrâkmẽ kubêkà jakamẽ kubêkà tykmẽ atemã kubêkà mêrebê xêdamẽ kubêkà kamrêkmẽ apýnh pĩ kudjy djàrimẽ apýnh mrybê erpãxi djwao mỳjja nhípêx djàrimẽ apýnh pĩ pãnh raxo mỳjja nhípêx djàrimẽ atemã ngônhbê brôdjimẽ ngônh tykmẽ atemã kênbê mamoremẽ ¹³mỳjja djãnhbê kaneramẽ me krã ngrãnh djãmẽ kikre kudjy djãmẽ me kudjy djàbê miramẽ me kudjy djã 'ômẽ uba kangômẽ atemã röny kangô 'ômẽ atemã djwý djôm 'ômẽ djwýbê trigumẽ me ô kribê mrytimẽ mrykĩ'átomtimẽ kawarumẽ pïo kãmranhtýxmẽ me memã àpênh kajgo ar ba, me kute meo pãnh ne amim me pa 'amýnh nhym me memã àpênh kajgo ar bajamẽ. Nà, mebêngôkredjwý.

Ja kunĩ ne Babirônij tĩnri amim amýn pãnh memã pi'ók kaprĩ ngã nhym kam ajbir kêt ne. Mỳj me'ô godja amim amýn kam pãnh mekmã pi'ók kaprĩre ngã. Arkati.

¹⁴Nhym me kute nêkrêxo ba djwýnh Babirônijmã kum,

—Be, apýnh me amã mỳjja mex kĩnhja ne arým me abê kêtukumrêx. Me anhô nêkrêxmẽ me akunhêr kunĩ ne arým tu biknorkumrêx. Dja ga ajte omũnh kêtukumrêx, ane. Nãm ã me kute nêkrêxo ba djwýnh kum ane.

¹⁵Ne nĩjar djan omũho kumex. Krĩrax kaprĩmẽ tokry pymaje nĩjar djan omũho kumex. Kukwakam ô nêkrêx rax ne mekbê kêt nhym me kam o aman kam abej àmrao kumex ne kam kaprĩ:ren abenmã kum,

¹⁶—Watĩre, Babirônij, krĩrax jabatãnh, watĩre. Tãm ne arým kêtukumrêx.

Nãm ipêxri kubêkà mexbit jangij ne o mrã. Kubêkà jakamẽ kakrãtykmẽ kamrêkmẽ. Nãm kunhêr pãnh raxobit amikunhêr, kên karýrmẽ kên jadjênhmẽ angã krã kute ngàp jadjênh pyrâkmẽ. Ý, tãm ne arým kêt ne.

¹⁷Nêkrêxja ne arým pyka mẽ amrà. Amikrà kêt ne arým pyka mẽ amrà. Kãxdjãkênh ipók pydjikam, ane.

Nãm ã me kute nêkrêxo ba djwýnh kaprĩkam abenmã ane.

Nhym kam me ngô raxkam kàkam ar bajadjwý kaprĩ. Me kute ngô raxbê pyka kêtka kà raxo ba djwýnhmẽ me kàtãm kàkam ar bajamẽ me kute kào ba djwýnh nhô àpênhmẽ me kute ngôkôt nêkrêxo bajamẽ. Me ja kunĩ ne me kaprĩn nĩjar kumex ne àmrao kumex. ¹⁸Krĩrax pók ne kũm tyk pymaje ne me nĩjar omũho kumex, abej àmrao kumex ne kãj bê abenmã kum,

—Krĩrax jabatãnhja pydjii. Nhýnh ne 'ômẽ kute aben pyrâk? ane. Nãm ã me kà raxkam ar baja abenmã ane. ¹⁹Ne kam kaprĩkam pykao amikrà kaprêprêk ne krĩrax jabej amran kam kaprĩ:re ne kum,

—Watĩre, Babirônij, krĩrax jabatãnh, watĩre.

Akukwakam ne ba me ikunĩ inhô nêkrêx rũnh ne. Nã bãm me kàkam awýr mỳjjao iban o bôx ga pãnh me imã mỳjja ngã. Ba me ikunĩ akukwakam inhô nêkrêx rũnh ne.

Ga tebê arým pyka mẽ amrà. Jakam dja ba me arĩk ar iba, ane. Nãm ã me ngô raxbê pyka kêtka kà raxkam ar baja krĩraxo aman ã kum ane. Nhym kam atemã me'ô kabên.

20 —Be, kàjkwa, on akĩnh. Arỳm ne Metĩndjwỳnh o ajkẽ. Me gadjwỳ, Metĩndjwỳnh nhõ me gamẽ Jeju kute me anorjamẽ Metĩndjwỳnh kabẽn jarẽn djwỳnhmẽ on me akĩnh. Metĩndjwỳnh arỳm me apãnh Babirônijo ajkẽ. Kam dja ga me tu akĩnhkumrẽx.

21 Nhyam kam kadjy mrãnh djwỳnh tỳxkumrẽx 'õ kẽn by. Kẽn rax, kẽn jabatãnh. O ne mekbẽ idjaer bãy ngãn ôm ne. Tãm ne kumỳn o ngõ rax kôpẽnàt ne. Ne mekmã kum,

—Dja ã Metĩndjwỳnh krĩrax jabatãnhbẽ Babirônijo bikẽnho ane, kôpẽnato bẽ o ane. Gẽdja tu biknorkumrẽx ne ajte kator kêtumrẽx.

22 Godja ajte me'õ me akam ngrer kêtumrẽx. Atemã pĩjãbãmẽ pomẽ ngõnhõ potimẽ. Ja kunĩkam ngrer dja ajte me akam kator kêtumrẽx. Nhỹnh ne me'õ mõi ajte me akam ngrero dja? Arkati. Nhyam me apỹnh ê mex djari 'õ ajte me akam kator kêtumrẽx. Nhỹnh ne me ê mex 'õ me akam dja? Arkati.

Nhyam me ni'õ me akam djwỳ ka'uko ỹr kêtumrẽx. Nhỹnh ne me ni'õ djwỳ ka'uko nhỹ got ga me aje marmã?

23 Nhyam ngõnhpõkdjwỳ me akurwỳ kêtumrẽx. Nhỹnh ne me akam ngõnh põk 'õ godja me akurwỳ?

Ne me keketdjwỳ mar kêt ne. Nhỹnh ne me'õ ajbir abenwỳr mõi ny got kĩnhkumrẽx ne kute abenmã kabẽn ne keketmã? Arỳm kêtumrẽx. Me akam me kute nêkrẽxo ba djwỳnh ne pyka kunĩkõt me kurãm õ nêkrẽx rũnh ne.

Ga arỳm apỹnh me ba djari me kunĩ noo akuno. Nã gãm adjukaneo me noo akuno nhyam arỳm pãnh Metĩndjwỳnh prĩne ajo ajkẽ, ane.

Nãm ã kadjy mrãnh djwỳnh ane.

24 Be, Babirônij ne Metĩndjwỳnh kabẽn jarẽn djwỳnhmẽ Metĩndjwỳnh nhõ me mexja par ar o ba. Babirônij kabẽnkõt ne me pyka kunĩkõt me par ar o ba. Kam ne Metĩndjwỳnh meo ngryk ne me pãnh prĩne Babirônijo ajkẽn pyka mẽ o amrà.

Me kute Metĩndjwỳnhmã mex jarẽn.

19 1 Nhyam kam mỳjja kute me krãptĩ kanga pyràk ba kuma. Kàjkwakam ne me krãptĩ kabẽn ne, ne,

—On me Metĩndjwỳnhmã mex jarẽ. Me banhõ Metĩndjwỳnh, ajbit ne kubẽ me bapytãr djwỳnh, gu me kam abenmã mex jarẽn abenmã bẽnjadjwỳr rax jarẽ.

2 Ta ne kabẽn pỹnh ne katat memã axwe pãnh jarẽ. Mrãmri ne arỳm kum pãnh jarẽ. Me'õ kuprỳ kurëtija, tãmja pydji ne rax ne pyka kunĩkõt me'ã axwe rẽ nhyam me kõt axwen arĩk ar ba, tãm. Kumã ne Metĩndjwỳnh pãnh jarẽ.

Arỳm ne kam ngryk ne o ajkẽ. Nãm õ àpẽnho ngryk ne kam me pãnh o ajkẽ, kute õ àpẽn par ne kamrõ kapĩkam ngryk ne kam me pãnh me'õ kuprỳ kurëtijao ajkẽ. Mrãmri, ane.

Nãm ã kàjkwakam me krãptĩ ane.

³Ne kam ajte kàj bê kabên ne,

—On me Metĩndjwỳnhmã mex jarẽ.

Krĩrax jabatãnhbê Babirônij ne mã pôr ne kũm tyk rã'a rã'ã. Àtyk kêtukumrêx, ane.

Nãm ã kàjkwakam me krãptĩ ane.

⁴Nhym kam mebêngêtbê 24mê mỳjja tĩn amãnhkrut ne amãnhkrut ne tu mỳrbê rôrôk ne Metĩndjwỳnhmã rax jarẽ. Metĩndjwỳnh krĩ djàtikam ýrjamã rax jarên kum,

—Mrãmri godja ga ã o ane, ane.

Ne kam ajte abenmã kum,

—Gu me on Metĩndjwỳnhmã rax jarẽ, ane.

⁵Nhym kam krĩ djàti kurũm me'ô kabên ne,

—Ê, me akunĩ, me abê Metĩndjwỳnh nhô àpênh, me amã umaja, me abênjadwỳrmẽ me akàtømmẽ me akunĩ on me me banhô Metĩndjwỳnhmã mex jarẽ, ane.

⁶Nhym kam mỳjja kute me krãptĩ kangao kumex pyrãk ba kuma. Kute ngô rãrãk pyrãk, kute na krikrit tỳx pyrãk. Nhym me krãptĩja kabên ne,

—On me Metĩndjwỳnhmã mex jarẽ. Bênjadwỳr djwỳnh me banhô Metĩndjwỳnh tỳxo kubê kumkati, ta ne bênjadwỳr rax ne mrãmri ar meo bakumrêx, kumã dja ga me mex jarẽ, ane.

⁷Ê, gu me on bakĩnhkumrêx. Me kute abenã ar mênh kadjy bakĩnhkumrêx. Gu me abenmã raxmẽ mex jarẽ. Arỳm ne ô akati 'ỳr bôx. Arỳm ne me kute Mrykĩ'atomti jabatãnh nymẽ prômẽ abenã ar mênhmã, kam dja gu me bakĩnhkumrêx.

Arỳm ne nija amimex ne. ⁸Arỳm ne kadjy kum kubêkã ngã nhym arỳm adjã.

Kubêkã mexkumrêx, kubêkã jadjênh, kubêkã ajmã kute kêtukumrêx, ane.

Nãm ã me krãptĩ memã ane. Nãm Metĩndjwỳnh kute ô me mexjamã axwe kêt jarênh nhym me katat mrãnh'ã kubêkã mex jakre ne ta ô me ja'ã prô jakre.

⁹Nhym kam kadjy mrãnh djwỳnh imã,

—On 'ã pi'ôk no'ôk. Arỳm ne me kute Mrykĩ'atomti jabatãnh nymẽ prômẽ abenã ar mênhmã, nhym me arỳm kute kadjy djwỳ djãrmã. Arỳm kadjy mry kumex ne. Nhym arỳm memã kabên. Me Mrykĩ'atomti jabatãnh nymẽ ro'ã ô kwỳ krên rax kadjy memã kabên ne. Me ajbit dja me kĩnhkumrêx. Me Mrykĩ'atomti jabatãnh nykôt ô kwỳ krênja, me ajbit dja me kĩnhkumrêx. On 'ã pi'ôk no'ôk, ane. Nãm ã kadjy mrãnh djwỳnh imã ane. Ne kam ajte imã,

—Ê, mrãmri ne Metĩndjwỳnh arỳm kabên pydjín arê, ane.

¹⁰Ba kuman kam kabem itu mỳrbê tỳm ne bit ije kum rax jarênhmã, bit ije kadjy mrãnh djwỳnhmã rax jarênhmã nhym imã,

—Kati, kwãrĩk wãnh. Badjwỳ ne ba Metĩndjwỳnhmã idjãpênh, akamymẽ ar akôt Metĩndjwỳnhmã idjãpênh. Akamymẽ ar atỳxkumrêx

me aje mekmã Jeju'a adjujarênhyakôt ne ba kum idjâpênhy. Badjwÿ ne ba ar akôt kum apê. Kam dja ga Metîndjwÿnhmãbit rax jarê, ane.

Be, me akajmâtã ne Metîndjwÿnh kabên jarênhy djwÿnh ô'a memã Jejubit'a ujarênhy ar ba. Ga me kam gadjwÿ ijuk'a Jejubit'a adjujarênhy ar aba. Kumãbit ne me kute rax jarênhy ar o bamã, ane. Nãm ã kadjy mrânhy djwÿnh imã ane.

Me'ô kawaru jaka'a ÿr.

¹¹Nhyam kam kâjkwa ajkij nyam kawaru jakaja dja. Nhyam me'ô 'a nhÿ. Me'ô nhidjibê Kabênkumrêx, ne ajte idji 'ôbê Katât kabên ne 'a nhÿ. Nãm katât memã axwe pânhy jarênhy kôt me'ÿr prôt ne. ¹²No pôk kute kuwy pôk pyràk ne kam bënjadjwÿr rax krâdjê tu. Krâdjê krâpti ne kutu. Ne ta idji 'a wajêt. Nhyam me kute idjija pumûnh kêt, ajbit ne kute aminhidji pumûnh. ¹³Ne ô kubêkã kute kamrôkam irja jadjà. Nhyam me kum idji jarê. Idjibê Metîndjwÿnh Kabên. Tãm ne me kum arê.

¹⁴Nhyam kâjkwakam Metîndjwÿnh nhô krâkamngônhy krâpti kôt mō. Ne kam kubêkã mexkumrêx, kubêkã jaka, kubêkã ajmã kute kêt jangij ne 'a mō. Kawaru jaka'a ne me krîn kôt mō. ¹⁵⁻¹⁶Nhyam Bënjadjwÿr jajkwa krekre kurûm kâxdjwa kajgo kato. Kâxdjwa kajgo djwa mexkumrêx ne kato. Nhyam kubêkã'a idjin kjê'a idji. Idjibê

Bënjadjwÿr raxbê kumkatiti:.

Kute bënjadjwÿr raxo pykabê me bënjadjwÿrja kunî jakrenhy mexi.

Kam ne kubê Bënjadjwÿr raxbê kumkatiti:.

Ne kam kâxdjwa kajgo djwa mexjao dja apÿnh me ba djâri meo ajkê. Meo ajkên kam ar meo ba, me kum âpênhyãm dja kabêno me anor ar o ba. Kabêno me anon me axwemã bën tÿx ar ba. Djãm kute akrânhyãm ar me axweo bamã? Kati, dja kâxo âbêr djão ar mekam ngryk ban mekam ngryk mex ne. Godja Metîndjwÿnh ngryk janênhy djâkam me kurê ne prîne me anê nyam me kamrô prôt ne. Djãm Metîndjwÿnh tÿxo kubê kumkati ngryk ngri got? Nãm ar meo ban i mekam ngryk mex ne.

¹⁷⁻¹⁸Nhyam kam kadjy mrânhy djwÿnh pydjîn dja, ba omû. Arngro tÿxkam ne dja. Ne kam kâj bê âkmã kabên ne. Âk kâjkwa tâ tor ne mrânhyja kunîmã kabên ne, ne kum,

—Me apa. Amrê me aben pydji. Arÿm ne Metîndjwÿnh me amã me anhô kwÿ krên djã rax ne o atom ne, me aje krên ne ajajnemã. Ë, bënjadjwÿr nhîmê krâkamngônhy nhô bënjadjwÿr nhîmê me âprâr nhîmê kawaru nhîmê 'a krâkamngônhy krîja nhîmê me kute me pa 'amÿnh nyam me memã âpênhy kajgo ar baja nhîmê me kute memã o pânhy kadjy âpênhyja nhîmê me bënjadjwÿr nhîmê me kâtâm nhîmê me kunî nhî dja ga me krên ajajne, ane. Nãm ã kadjy mrânhy djwÿnh âkmã kabên ane.

¹⁹Nhyam kam mry kute meo bajamê ô krâkamngônhy me bënjadjwÿr rûnhmê arÿm akuprô. Me kute Jeju kawaru jaka'a ÿrja 'ÿr prôtmyãm ne me akuprô. Nhyam arÿm kutã Jejudywÿ ô krâkamngônhyre akuprô.

²⁰Ne kam amijo aptàn ar pa 'amỳn kuwyo imôtikam ar kumẽ. Nãm mrymẽ kabẽn jarẽn djwỳnh 'èxnhĩa ro'ã ar pa 'amỳn aro tẽn kuwyo imôtikam ar kumẽ. Kabẽn jarẽn djwỳnh 'èxnhĩa ta kute mỳjja pumũnh kêt kwỳ nhipêx, kute mry djô'a kabẽnkôt mỳjja pumũnh kêt kwỳ nhipêx ne o kute me noo biknor. Nhỳnh me ja ne me noo akuno? Bir, me'ã mry nhidji jarij ne kute mry karômã amijarẽn ne kute kum rax jarẽnhja, me tãm ne kabẽn jarẽn djwỳnh 'èxnhĩa me noo akno. Kam ne Bẽnjadwỳr Jeju mrymẽ kabẽn jarẽn djwỳnh 'èxnhĩa ar ro'ã ar pa 'amỳn aro tẽn kam kuwyo imôtikam ar kumẽ. Ar tĩn ne ar pa 'amỳn aro tẽn kuwyo imôtikam ar kumẽ. Kuwymẽ kẽn ngrãngrã pòkkam ar kumẽ.

²¹Ne kam me kôt mórja nhimex ne. Jeju kawaru'ã ỳrja tãm ne ajkwa krekre kurũm kàxdjwa kajgo katorjao me imex ne. O ne pyka kunikôt me bẽnjadwỳrmẽ ar ò krākamngôn ro'ã me imex ne. Me imex nhym àk kunĩ me kwỳ krẽ:n meo ajne.

Xatanaj djwupre'ã amex kubê 1.000.

20 ¹Nhym kam kadjy mrãnh djwỳnh 'õ kàjkwa kurũm tẽn ruw ba omũ. Ikrakam ne kam o kajkep djà byn o tẽn o ruw. Mỳjkam o kajkep djà nã? Bir, kre ry typydjikam o kajkep djà ne kubyn o tẽn o ruw. Kàxiràxtimẽ ne kubyn o ruw.

²Ne kam mry kaàkjao tỳm, kubê ne Kangã tũm, kute me kàmex jarẽn djwỳnh. Xatanaj tãm ne o tỳm ne kàxiràxtio uwpre. Djãm uwpre'ã amex pydjĩ got. 'Ã amex krãptĩ. 'Ã amexbê 1.000. ³Nãm tu kre ry typydjikam kumẽn 'ã ijẽn kam o kajkep ne prĩne 'ã ijê djào amrà, mỳjja kute tom pyràk o prĩne oy.

Be, Xatanaj kute ajte pyka kunikôt me noo biknorbê ne krekam kumẽn 'ã ijê. Godja 'ã amexbê 1.000 apêx nhym kam ajte kadjy mrãnh djwỳnh 'ã kutan kaba nhym ar ba ngrire. Tãm ne ja. Be, ba kam ajte mỳjja 'òdjwỳ pumũ.

⁴⁻⁵Be, me krĩ djàtidjwỳ ne kumex ba omũ. Nhym me kam krĩ. Metĩndjwỳnh ne arỳm me jamã kum,

—Me ga dja ga me memã axwe pãnh jarẽ, ane.

Me karòdjwỳ ne ba omũ. Mỳj me karõ nã? Bir, me kute memã Jeju'ã ujarẽn ar ban Metĩndjwỳnh kabẽn'ã ujarẽn ar ba nhym me kute me mut krākàr nhym me tyk karõ ne ba omũ. Me kute mrymẽ mry karõ arkum rax jarẽn kêt, kute aro Metĩndjwỳnh ne arkum amijarẽn kêt nhym mry te kute me'ã aminhidji janhôr prãmja, te kute me kuka'ã nàr me ikra'ã aminhidji janhôr prãmja, nhym me kubê bikẽn nhym kam me kute me par karõ ne ba omũ. Me tãm dja me akubyn tĩn ne kam Kritumẽ ro'ã ar meo ba. Ar meo ba'ã amex krãptĩ ne. 'Ã amexbê 1.000. Me tyk ne akubyn tĩn kutewa ne ja. Nhym bep me kàtàm tykja, me tãm dja me'ã amexbê 1.000 nhym me akubyn tĩn ne.

⁶Nhym bep me tyk ne akubyn tĩn kutewaja dja me kĩnhkumrẽx. Arỳm mexo me akrenh me:x ne. Dja me ajte ty? Arkati. Dja me ajte tyk kêtumrẽx, ne kam Metĩndjwỳnhmẽ Kritu arkum apê, mebê me kadjy

Metĩndjwÿnh mar djwÿnh ne arkum àpênh ba. Ne kam ar ro'ã ar meo ba. Ar meo ba'ã amex krãptĩ. 'Ã amexbê 1.000.

Kute kuwyo imôtikam Xatanaj mênh.

⁷Nhym kam amexbê 1.000 apêx nhym kam kadjy mrãnh djwÿnh Xatanaj'ã kuta. Kubê ijêja'ã kutan me kadjy kaba. ⁸Nhym arÿm kato, pyka kunĩkôt ajte kute me noo biknormã kato. Dja kàjkwa kraxkam me jamê kàjkwa nhôtkam me jamê aktã kàjkwa nhirê'ãnh me jamê mekbê Kokmê mekbê Makokmê me kunĩ 'ÿr bôx ne memã kabên jarên me noo aknon meo akprô. Kute Metĩndjwÿnh nhô me ja'ÿr prôt ne kute me par kadjy nàràm meo akprô nhym me kumex. Nãm me kute ngô rax mÿrri pykati ngrà ja pyrãk. Pykati ngrà tãm ne me o itun te kute abenã akremã nhym krãptĩ: anen amũ ajkamê nhym me te o ane. Nãm ã krakamngônhre kumex o ane.

⁹Ne kam prĩne me kadjy pyka jaên kam me'ÿr môn Metĩndjwÿnh nhô me mexjamã ipôk ne, krĩ mexmã ipôk ne. Metĩndjwÿnh kum krĩrax kĩnhkumrêxja tãm ne me kum ipôk ne. Nhym kam kàjkwa kurũm kuwy ruw ne prĩne me kuga nhym me prĩne xêr.

¹⁰Nhym kam Metĩndjwÿnh bôm 'êxnhĩja mē, kute me noo biknor djwÿnhja kuwyo imôtikam kumê. Kuwymê kên ngrãngrã pôkkam kumê. Kam ne ôbê mrymê kabên jarên djwÿnh 'êxnhĩja mē. Ne kam ajbir kam Xatanaj mē. Kam ne Metĩndjwÿnh prĩne aro bikênh rax ne. Nhym ar tokry: ne àmnhirênh ar ba. Àmnhirênh ar ba rã'ã rã'ã. Àmnhirênh ar ba: nhym 'ã akamãt ne tãmkam 'ã akati. Dja o ino rer kêtikumrêx ne.

Metĩndjwÿnh kute me tykmã pãnh jarênh.

¹¹Nhym kam krĩ djãti jaka dja nhym kam me'ô nhÿ ba omũ. Nhym kam umaje pykamê kàjkwa prôt ne nhĩ'ãm tẽn akuno. ¹²Nhym kam me tyk kabem kumex. Me tyk kunĩ, me bēnjadjwÿrmē me kâtømmē krĩ djãti kabem kumex. Nhym kam pi'ôk no'ôk'ã kurê.

Ne kam ajte pi'ôk no'ôk 'ôdjwÿ'ã kuta. Metĩndjwÿnh kute me tĩn rã'ã rã'ã'ã no'ôkja pi'ôk tãm ne 'ã kuta.

Nhym bep ate ne kute pi'ôk no'ôk kumrêx'ã rênhja. Pi'ôk jakôt ne Metĩndjwÿnh memã axwe pãnh jarê. Me tĩnri axwe'ã pi'ôk no'ôk ja ne Metĩndjwÿnh 'ã kurên kam mekmã axwe pãnh jarênho nhÿ, me tykmã pãnh jarênho nhÿ.

¹³Nhym kam ngô raxbê pyka kêtjadjwÿ Metĩndjwÿnhmã me tyk kanga. Ngô kute me imexja tãm ne kum me kanga. Nhym apÿnh mÿjja kute me par djãri Metĩndjwÿnhmã ajte me kanga. Nhym me tyk nhô pyka Metĩndjwÿnhmã ajte me kanga. Kum me kanga nhym me tyk kunĩ krĩ djãti kabem kumex. Nhym mekmã pãnh jarênho nhÿ. Me tĩnri kute amijo bakôt ne memã pãnh jarênho nhÿ.

¹⁴⁻¹⁵Mekmã pãnh jarênh pan kam ate apÿnh mÿjja kute me par djãri mekam o pôx ne kuwyo imôtikam kurê ne ajte me tyk nhô pykadjwÿ kuwyo imôtikam kumê nhym arÿm me tyk nhô pykaja kêt ne. Nhym bep

mỳjja kute me parja gêdja ajte akubyn me par kêtikumrêx ne. Arỳm me tyk kêt. Mỳjja kute me parja arỳm kêt.

Nhym me idji'ã no'ôk kêtja, Metĩndjwỳnh kute me tĩn ne ar ba rã'ã rã'ã kadjy idji'ã no'ôk kêtja, me tãm ne Metĩndjwỳnh kuwyo imôtikam me kurê. Me tyk nhijukri tyk ne ja.

Metĩndjwỳnh nhô Djeruxarê ny.

21 ¹Nhym kam kàjkwamê pyka arỳm ny ba omũ. Nhym bep kàjkwatũmmê pyka tũm ne arỳm nhĩ'ãm tẽn akuno. Nhym ngô raxbê pyka kêtđjwỳ arỳm kêt.

²Nhym kam krĩrax mextire ruw ba omũ. Krĩraxbê Djeruxarê arỳm ny ne ruw. Kàjkwatũm kurũm ruw. Metĩndjwỳnh kurũm ne ruw ba omũ. Djeruxarê arỳm mexkumrêx. Kute me mjên 'ỳr ba kadjy kute amimex pyrāk, me kute mjên kadjy amimex ne kute kubêkà mex jangjênh ne mrãnh nhym me kute abenã me rênh pyrāk.

³Nhym kam krĩ djàti kurũm me'ô kabên. Kàj bê kabên ne memã kum, —Ê, arỳm ne Metĩndjwỳnh pykakam me ja'ỳr bôx ne kam mekam ar bamã. Dja mekam ar ba ne kam meo aminhôkumrêx ne.

Nà, Metĩndjwỳnh ta dja mekam djan ⁴kam me kunĩmã no kangô kukôn mekmã o apêx.

Nhym kam me arỳm tyk kêtikumrêx ne.

Ne kaprĩ kêtikumrêx ne.

Ne mỳr kêtikumrêx ne.

Ne tokry kêtikumrêx ne. Mỳkam?

Mỳjja kunĩ tũmja arỳm nhĩ'ãm tẽn ne biknorkam ne arỳm kêt ne, ane. Nãm ã krĩ djàti kurũm kabên ane.

⁵Nhym kam krĩ djàtikam ỳrja ne kabên ne,

—Ê, arỳm ne ba mỳjja kunĩo ny, ane.

Ne kam ajte,

—On 'ã pi'ôk no'ôk. Mrãmri ne kabênja. Djãm kabên kajgo? Arkati, kabênkumrêx, ane.

⁶Ne kam imã,

—Anũ. Arỳm ne ba o ino re.

Ba ibê mỳjja kunĩ krax ne ajte ibê mỳjja kunĩ 'ênhôt.

Ba ne ba adjakamã itũm ne kam ije mỳjja nhipêxo itêm ne ije inomã mênh, ba.

Djori me'ô kum kôr ba kum ngô ngã gê o ikô. Ngô tĩn dja ba tu kum kajgo ngã gê o ikô. Mỳj ngô tĩn nã? Bir, ngô kute meo tĩnja dja ba kum kungã.

⁷Me me kuràm tỳx ne kute ijãno ãm jamãbit dja ba mỳjja mex kunĩ ngã ne kam tu meo ikrakumrêx nhym me imã, “Me inhô Metĩndjwỳnh”, ane.

⁸Nhym bep me kute bit ijo aminhômãn kute amikam me kabên pymaje ikangaja,

ne kam ajte me kute amim imar kêtja,
 me kute axweo amiptàrja,
 me kute me par prāmja,
 me prō prāmja, me mjên prāmja,
 me udjy,^h
 me kute mỳjjao Metĩndjwỳnh karō nhipêx ne kute we kum ar
 amijarênhō baja,
 me 'êxnhi kunĩ,
 me arĩk ar ba kunĩ dja me iwỳr bōx kêtikumrêx ne.

Me ja kunĩ dja ba kuwyo imôtikam me kurê. Kuwymê kên ngrāngrā
 pōkkam me kurê. Me tyk nhijukri ajte tyk ne ja.

⁹Nhym kam kadjy mrānh djwỳnh 'ō kato ba omũ. Kadjy mrānh
 djwỳnhbê 7 ne apỳnh mỳjjao kute meo bikênh djari Metĩndjwỳnh ngryko
 ino rero ngônho ipu kute amỳnh ne o ku'ê ja 'ō ne iwỳr tên imā,

—Apa, amrê tē ba on amā akre ga omũ. Mrykĩ'átomti jabatānh ny prō
 dja ba amā akre. Me arỳm kute abenā ar mēnhja dja ba amā akre, ane. ¹⁰Ā
 imā anen kam ikarōo tē. Krānh jabatānh, krānh prēkti'ỳr ikarōo tēn ijo
 bōx.

Nhym kam krĩrax mextire ruw ba omũ. Prō ne rwỳkja. Krĩraxbê
 Djeruxarê arỳm ruw. Kàjkwa kurũm, Metĩndjwỳnh kurũm ruw ba omũ.
¹¹Nhym aparmā adjênh tē. Metĩndjwỳnh jadjênhō ne adjênh ne. Ne
 kam karỳr kute kên pānh rax, kên ngrāngrā jadjênh tỳxja pyrāk. Ne ajte
 karỳ:r kute krytyrānh karỳrja pyrāk. Nām ā krĩrax jadjênh anen ruw.

¹²Nhym kikre bu'ā apỳnh kên djari aben nhiby adjwỳro tē nhym ā
 prēktire anen ā utĩ ane. Nhym kam ajkwa krekrebê 12. Nhym kam apỳnh
 ajkwa krekre djari kadjy mrānh djwỳnh 'ā ku'ê. Nhym ajkwa krekre'ā idji
 arij. Apỳnh mekbê idjaer nhingêt kukāmāre nhidji djari ajkwa krekre 'ā
 idji arij. Idjibê 12 ne apỳnh kre'ā arij.

¹³Nām kàjkwa krax 'ānh ajkwa krekre amānhkrut ne ikjêkêt. Ne
 kàjkwa nhôt'ānh ajkwa krekre amānhkrut ne ikjêkêt. Ne kàjkwa
 nhirê'ānh aktā ajkwa krekre amānhkrut ne ikjêkêt.

¹⁴Nhym kikre bu'ā apỳnh kên djari aben nhiby adjwỳro tēmja krakri
 ne kēnpotibê 12 ikwā. Kēnpoti'ā ne Mrykĩ'átomti jabatānh ny kute ar
 anorbê 12ja idji arij.

¹⁵Nhym kadjy mrānh djwỳnh kute imā kabēnja àbêr djā byn o dja.
 Kên karỳro àbêr djā. O kute krĩrax'ā akremā. Kute krĩraxmê ajkwa
 krekremê bu'ā apỳnh kên djari aben nhiby adjwỳro tēmjamê kute 'ā
 akremā.

^h21.8 Me kute apỳnh mỳjja mar, namê mry kaàkmê me karômê, me tām ne me amijo
 wajangao ba. Nhym me karō punu ne me kute me jakôt me noo biknor prāmkumrêx. 'Ā dja
 gar, A Tex 2.9, Apôx 13.13, Karō 8.9-24, 13.6-12, 19.13-19 jarê.

¹⁶Nhym krĩrax pomẽ rymẽ kute aben pyræk. Nhym pokôt 'ã akren anhkôt 'ã akren prêkkôt 'ã akre. Nhym kunĩ'ã akre kute aben pyræk. Ne 'õ aben japanh kêtumrêx. Àbêr djào ne 'ã akreo tẽ. 'Ã akrebê 2.200 kiometu.

¹⁷Nãm kikre'ã akren kam atãri kikre bu'ã kênja'ã akre. Prêk'ã akrebê 64 metu. Me baje mỳjja 'ã akrekôt ne kadjy mrãnh djwýnh kikremẽ kikre bu'ã kênjamẽ 'ã akre.

¹⁸Nhym bu'ã kênja ne ngrãngrã kute bõre ngrãngrã pyræk o ne ipêx ne. Nhym bep krĩraxja ne kryt karýro ipêx ne. Kryt karýrobit, atemã mỳjja 'õmẽ o bikàr kêt. Nhym krytja karý:r kute ixê jadjênh pyræk.

¹⁹⁻²⁰Nhym kam kikre bu'ã kênja krakri kênpotikam apýnh kên djàri kumex. Kên pãnh raxbit. Kikre bu'ã kênja kĩnh kadjy.

Kên kutewa ne ngrãngrã kute bõre ngrãngrã ja pyræk.

Ne atãri ja ngrãngrã tỳx kute kwênh ngrãngrã ngwýnh ja pyræk.

Ne atãri ja kãjbê rãrãr kamrêk kute kôkanê ngwýnh rãrãr kamrêk ja pyræk.

Ne atãri ja ngrãngrã kute krwýnh ngwýnh ngrãngrã ja pyræk.

Ne atãri ja kajngàr kute ngãhntey nhy kajngàr ja pyræk.

Ne atãri ja kamrêk kute tyrti tekà kamrêkti, tekà kamrêk ja pyræk.

Ne atãri ja kãjbê rãrãr kute mutêkre ngwýnh rãrãr ja pyræk.

Ne atãri ja kãjbê ngrãngrã kute kôtkaak ngwýnh kãjbê ngrãngrã ja pyræk.

Ne atãri ja ngrãngrã kute bãy'lyre ngrãngrã ja pyræk.

Ne atãri ja kãjbê ngrãngrã kute krãkamkãxte ngwýnh kãjbê

ngrãngrã ja pyræk.

Ne atãri ja ngrãngrã tỳx kute atorti ngrekà ngrãngrã ja pyræk.

Nhym bep kute katê ja ne rãrãr kute kênnetojre ngwýnh rãrãr ja pyræk. Be, kikre bu'ã kên krakri apýnh kênpoti djàri ne ja.

²¹Nhym bep kikre bu'ã kênja ajkwa krekrebê 12ja ne angà krã. Angà krãti:, angà krãtio ne kikre bu'ã kênja ajkwa krekre kunĩo 'ã ijê djà, tãm ne kute ngáp jadjênh pyræk. Apýnh ajkwa krekre djàri ne kadjy angà krã'ã akren o ipêx ne, angà krã pýnh. Be, kikre bu'ã kên jajkwa krekre ne ja.

Nhym bep krĩkam pryjadjwý kryt karýro pry. Kryt karýrobit, atemã mỳjja 'õmẽ o bikàr kêt. Karý:r kajgon kam apôkmã rít, kute ngôn̄h karýr apôkmã rít ja pyræk.

²²Djãm krĩrax jakam Metĩndjwýnh nhõ kikreti? Kati, arým ne bõx ne me bakam ar mrã. Bẽnjadjwýr Metĩndjwýnh tỳxo kubê kumkatimẽ krabê Mrykĩ'átomti jabatãnh nyja ar tãm ne arým ar bõx ne me bakam ar mrã. Arým ne ar ro'ã me bawýr ruw ne me bakam ar mrã. Djãm me kute kum kabên kadjy ne mete kum kikremã? Kati, arým ne ar bõx ne me bakam ar mrã. Mỳj kadjy dja me kum kikre? Djãm kãjkwakam ar ba rã'ã ne mete kum kikren kam kum kabênmã?

²³Djori kam mytmẽ mytyrwý kute me kurwýmã? Kati, Metĩndjwýnh ta adjênh o dja me kurwý. Krabê Mrykĩ'átomti jabatãnh ny jadjwýbê ne me kurwý djwýnh. ²⁴Be, ar irã jakam godja apýnh me ba djàri kunĩ kam mrã, mrãnh mextire. Nhym pyka kunĩkôt bẽnjadjwýr krĩraxmã õ mỳjja mex kunĩo wangijn o krĩrax kĩnh ne.

²⁵Nhym krĩ bu'ã kên jajkwa krekredjwÿ 'ã ijê kêtikumrêx ne. Djãm akamàt kadjy dja me ajkwa krekre'ã ijê? Kati, akamàt kêtikumrêx, a'u ry typydji. Kam godja ajkwa krekre'ã ijê kêtikumrêx ne. ²⁶Nhym apÿnh me ba djàrikam me ja ô mÿjja mexo wangijn o krĩrax kĩnh ne. Nhym me rũnh krĩraxmã wangij nhym krĩrax ô'ã kĩnhkumrêx ne.

²⁷Nhym bep mÿjja punu 'ô dja kum àr kêtikumrêx ne. Me pijàm kêtme me 'êxnhĩmẽ me ja 'ô dja kum àr kêtikumrêx ne. Nhym bep Mryki'ãtomti jabatàn ny kute ô pi'ók no'ókka me tĩn rã'ã rã'ã'ã idji janhôrbabit dja me kum wangij.

Ngô kute meo tĩn.

22 ¹Nhym kam kadjy mrãnh djwÿnh imã ngô kute meo tĩn pakrax jakre. Ngô kute meo tĩn ne prôto nõ ba omũ. Metĩndjwÿnhmẽ Mryki'ãtomti jabatàn nyre ar krĩ djàti kurũm ne prôto nõ. Karÿ:rkumrêx. Karÿr kute krytyrãnh pyræk. ²Nãm pry nhôkre djækôt prôto nõ. Krĩraxkam pry nhôkre djækôt prôto nõ nhym aktã nokà'ã pidjô kute meo tĩnja dja.

Pidjô bàri amãnhkrut ne mytyrwÿ kunĩ kôt aben pãnh ô kadjy aktã ngô nhijên o dja. Aktã ne ngô jakà'ã ngô nhijên o dja. Be, pidjô ja ne ar mytyrwÿ kunĩkôt ôo kute aben japanho ãm kadjy dja. Nãm apÿnh mytyrwÿ djàri'ã pidjô jakren o 12. Mytyrwÿ kunĩ kôt ôn bikaprãr kêtikumrêx kadjy 'ã akre. Nhym bep pidjô 'ôja ne kubê me umar mex djà, pyka kunĩ kôt kute meo mex nhym me umar mex ne kanê kêtma.

³Djãm krĩ jakam mÿjja kute meo bikênhmã? Kati, krĩ ja gêdja tu kam me mex ryti pydji. Nhym mÿjja kute meo bikênh dja 'ÿr àr kêtikumrêx. Metĩndjwÿnhmẽ Mryki'ãtomti jabatàn ny dja kam ar meo ban meo djuw mex o ba. Nhym ô àpênhdjwÿ kum àpênh mexkumrêx ne. ⁴Ne kam Metĩndjwÿnh nokre pumũ nhym kam me kuka'ã Metĩndjwÿnh aminhidji janhô nhym me 'ã ar ba.

⁵Nhym kam kam akamàt kêtikumrêx ne. Nhym kam ngônhpôkti kêtikumrêx ne. Nhym arngro kêtikumrêx ne. Mÿj kadjy dja ngônhpôktimẽ arngromẽ? Bênjadjwÿrbê Metĩndjwÿnh dja me kurwÿ. Nhym Metĩndjwÿnh nhô me ja dja ar meo ba rã'ã: ar meo ba.

⁶Nhym kam kadjy mrãnh djwÿnh imã,

—Ê, mrãmri ne kabênja. Djãm kabên kajgo? Arkati. Kabênkumrêx.

Amrêbê Bênjadjwÿrbê Metĩndjwÿnh ne me kute kabên jarênh djwÿnhmã ta Karô jano nhym me kam ô'ã memã kabêno amirĩt ne. Nhym kam ajbir jakam ta arÿm ajte kadjy mrãnh djwÿnh jano. Kute ô àpênhmã mÿjja kator 'ÿr jao amirĩtmã ne ano. Kute mÿjja kator kêtja anhÿr djwÿnhrà m mekmã o amirĩt kadjy ne ano. Arÿm kator 'ÿr, ane. Nãm ã kadjy mrãnh djwÿnh imã ane.

Jeju bôx 'ÿr arê.

⁷Nhym Jejudjwÿ arÿm me bamã,

—Ê, arÿm ne ba akubyn me awÿr ibôx 'ÿr, ane. Ê, me'ô kute prĩne ikabênkôt amijo ba jabej dja kĩnhkumrêx. Metĩndjwÿnh kute anhÿr

djwÿnhràm memã mÿjjao
kator'ã ujarênh ga aje 'ã pi'ôk
no'ôk nhym me kute amim
mar ne kôt amijo ba jabej, be,
me tãm dja me kÿnhkumrêx
ne, ane.

Nãm ã Jeju me bamã ane.

⁸Ba, ba ibê Djuão ne ba
arÿm prÿne omũ. Nã bãm
mÿjja ja kunĩ pumũn kuma.
Ne kam mÿjja kunĩ pumũn
mar pan kam kabem itu
mÿrbê tÿm. Kadjy mrãnh
djwÿnh kute imã mÿjja 'ã
karô kabem itu mÿrbê tÿm
ne bit ije kum rax jarênhmã.

⁹Nhym kam imã,

—Kati, kwãrik
wãnh. Badjwÿ ne ba
Metĩndjwÿnhmã idjãpênh,
akamybê Metĩndjwÿnh
kabên jarênh djwÿnhmẽ
ar akôt Metĩndjwÿnhmã

idjãpênh. Me akunĩ aje pi'ôk no'ôkkôt, ajbir aje Metĩndjwÿnh kabên'ã pi'ôk
no'ôk jakôt amijo abajamê ne gu me baro'ã Metĩndjwÿnhmã badjãpênh.
Kam dja ga Metĩndjwÿnhmãbit rax jarê, ane. ¹⁰Ne kam ajte imã,

—Gora udjur kêt. Metĩndjwÿnh kute anhyr djwÿnhràm memã mÿjjao
kator'ã ujarênh ga aje 'ã pi'ôk no'ôkja kwãrik wãnh udjur kêt. Arÿm 'ÿr.
Mÿjja ja kunĩ arÿm kator 'ÿr. ¹¹Kwãrik wãnh me axwe wãnh axwe ar ba rã'ã.
Nhym me arík ar badjwÿ tu wãnh arík ar ba rã'ã. Kute amimarkôt arík ar
wãnh ba. Gê me kute katât amijo badjwÿ katât amijo ba rã'ã, katât amijo ba
ry typydji. Nhym Metĩndjwÿnh nhô me mex jadjwÿ mex rã'ã, mex ry typydji.

¹²Ê, arÿm ne Jeju me bamã kabên jarê. Gora me kabên ma. Nãm,

—Ê, arÿm ne ba akubyn me awÿr ibôx 'ÿr. Dja ba bôx ne kam me amã
pãnh jarê. Me aje amijo abakôt me amã pãnh jarê. Me ajaxwemê me
amrãnh mexmê kôt me amã pãnh jarê. Ê, me ajaxwe dja ba me ajo ajkê
nhym bep me mexmê gêdja ba me iro'ã ar iba. ¹³Ba ibê mÿjja kunĩ krax
ne ajte ibê mÿjja kunĩ 'ênhô. Ba ne ba adjakamã itũm ne kam ije mÿjja
nhipêxo itêm ne ije inomã mênh. Ba ren ije kàjkwamê pykamê omũnh 'ãno
idjãm kêt nhym ren amrêbê amijo ajkê nhym ren mÿjja kunĩ kêt ne, ane.

¹⁴Be, Metĩndjwÿnh nhô me mexja, me axwe kêtja dja me kÿnhkumrêx
ne. Me tãm dja me kute kubêkã'ã ngrã o pôxkam aka pyrãk. Dja me axwe



(Mÿjja apôx 22:7)

kêt ã mextire ne ã kĩnh ane. Me jabit, Metĩndjwỳnh nhõ me mexja dja me pidjõ kute meo tĩn ku ne krĩrax bu'ã kẽn jajkwa krekrekõt wangij ne kam Metĩndjwỳnh nhõ krĩraxkam ar ba.

¹⁵Nhym bep me kute ropre pyræk ne arĩk ar bajamẽ me udjymẽ me prõ prãmmẽ me mjên prãmmẽ me kute me par prãmmẽ me kute mỳjjao Metĩndjwỳnh karõ nhĩpêx ne kute we kum amijarẽnho bajamẽ me 'êxnhĩmẽ me kabẽn krãptĩjamẽ, me tãm gêdja me kum ngjênh kêtumrêx ne.

Nhym kam Jeju ajte me bamã,

¹⁶—Ba ibê Jeju ne ba me amã ikadjy mrãnh djwỳnh jano. Kute apỳnh me aje ikõt aben pydjĩ djari me amã katåt mỳjja ja jarênhmã. Ba ne ba ibê Dawi tãmdjwỳkumrêx ne ãm djækam dja. Ba ne ba Dawi nhĩpêx ne. Ba ne ba ije akati maktã umajyrtire pyræk ne inhĩrækumrêx, ane. Nãm ã Jeju me bamã ane.

¹⁷Nhym Metĩndjwỳnh Karõmẽ Mrykĩ'átomtĩ jabatàn ny prõmẽ ar Jejumã kum,

—On amrê tẽ, ane. Jeju nhõ me jabê Mrykĩ'átomtĩ prõ ne kum,

—On amrê tẽ, ane.

Godja ga me Jeju'ã idjujarênhja man kam gadjwỳ kum,

—On amrê tẽ, ane.

Nhym Jeju memã kum,

—Gê kam me'õ kum kôr jabej on amrê iwỳr tẽn ngõ tĩno ikõ. Tu kajgoo ikõ, pãnh kêt. Amã ngõ kute meo tĩnja kĩnh jabej tu kajgoo ikõ, ane. Nãm ã Jeju kabẽn ane.

¹⁸Ê, ibê Djuao ne ba ije me amã ikabẽn jarênhmã.

—Me apa, me ikabẽn ma. Gora me aje ja mar jabej, Metĩndjwỳnh kute anhyr djwỳnhhrãm memã mỳjjao kator'ã ujarênh ba ije 'ã pi'òk no'òkja aje mar jabej gora me ikabẽn ma. Dja ga me ajõ ijukri adjan atemã akabẽn 'õ jarên arỳm Metĩndjwỳnh kabẽn ajkê nhym arỳm pãnh me ajõo ajkê. Apỳnh ije meo bikênh djari'ã pi'òk no'òk jao dja me ajõo ajkê. ¹⁹Ba ibê Djuao ne ba ajte ije me amã ikabẽn jarênhmã,

—Godja ba ije anhyr djwỳnhhrãm Metĩndjwỳnh kute me amã mỳjjao kator'ã pi'òk no'òk ja ga me ajõ kabẽn 'õo ajngrã nhym arỳm Metĩndjwỳnh abê mỳjja nê. Abê pidjõ kute meo tĩnja nên abê õ krĩrax mextireja nê ne ije me amã mỳjja mex jarênh ne ije 'ã pi'òk no'òk ja tãm dja me ajõbê nê, ane.

Be, me ikabẽn ja ma. Ê, gêdja Jejudjwỳ me amã kabẽn jarê,

²⁰—Ba ibê Jeju, ije katåt me amã mỳjja kunĩ jarênh ne ba me amã, “Mrãmri ne ba arỳm me awỳr ibõx 'ỳr”, ane.

Dja gu me,

—Nà, Bẽnjadjwỳr Jeju, mrãmri. On amrê tẽ, ane.

²¹Gê me banhõ Bẽnjadjwỳr Jeju ukaprĩkõt prĩne me bajo djuw mex. Mrãmri. Tãm ne ja.